

四庫全書

史部

欽定四庫全書

明史卷二百八十一

大學士張廷玉等奉 敕修

列傳一百六十九

循吏

明太祖懲元季吏治縱弛民生凋敝重繩貪吏置之嚴
典府州縣吏來朝陞辭諭曰天下新定百姓財力俱困
如鳥初飛木初植勿拔其羽勿撼其根然惟廉者能約

已而愛人貪者必朘人以肥己爾等戒之洪武五年下
詔有司考課首學校農桑諸實政日照知縣馬亮善督
運無課農興士效立命黜之一時守令畏法潔已愛民
以當上指吏治煥然丕變矣下逮仁宣撫循休息民人
安樂吏治澄清者百餘年英武之際內外多故而民心
無土崩瓦解之虞者亦由吏鮮貪殘故禍亂易弭也嘉
隆以後資格既重甲科縣令多以廉卓被徵擢取臺省
而龔黃之治或未之覩焉神宗末年徵發頻仍礦稅四

出海內騷然煩費郡縣不克修舉厥職而廟堂考課一切以虛文從事不復加意循良之選吏治既以日媮民生由之益感仁宣之盛邈乎不可復追而太祖之法蔑如矣重內輕外實政不修謂非在上者不加之意使然乎漢史丞相黃霸唐史節度使韋丹皆入循吏傳中今自守令超擢至公卿有勲德者事皆別見故採其終于庶僚政績可紀者作循吏傳

陳灌

方克勤

吳履 廖欽等

高斗南 余彥誠等

史誠祖 吳祥等

謝子襄 黃信中
夏升

貝秉彝 劉孟雅等

萬觀

葉宗人

王源

翟溥福

李信圭 孫浩等

張宗璉

李驥 王瑩等

李湘

趙豫 趙登等

曾泉

范衷

周濟

范希正
劉綱

段堅

陳綱

丁積

田鐸

唐侃

湯紹恩

徐九思

龐嵩

張淳

陳幼學

陳灌字子將廬陵人也元末世將亂環所居築塲種樹人莫能測後十年盜蜂起灌率武勇結屯林中盜不敢

入一鄉賴以全太祖平武昌灌詣軍門謁見與語奇之
擢湖廣行省員外郎累遷大都督府經歷從大將軍徐
達北征尋命築城泰州工竣除寧國知府時天下初定
民棄詩書久灌建學舍延師選俊秀子弟受業訪問疾
苦禁豪右無并創戶帖以便稽民帝取為式頒行天下
伐石築隄作水門蓄洩護瀕江田百姓咸賴有坐盜麥
舟者論死數十人灌覆按曰舟自漂至而愚民閔取之
非謀劫也坐其首一人餘悉減死灌丰裁嚴正而為治

寬恤類此洪武四年召入京病卒

方克勤字去矜寧海人元末台州盜起吳江同知金剛
努奉行省命募水兵禦之克勤獻策弗納逃之山中洪
武二年辟縣訓導母老辭歸四年徵至京師吏部試第
二特授濟寧知府時始詔民墾荒閱三歲乃稅吏徵率
不俟期民謂詔旨不信輒棄去田復荒克勤與民約稅
如期區田為九等以差等徵發吏不得為奸野以日闢
又立社學數百區葺孔子廟堂教化興起盛夏守將督

民夫築城克勤曰民方耕耘不暇奈何重困之畚鍤請
之中書省得罷役先是久旱遂大澍濟寧人歌之曰孰
罷我役使君之力孰活我黍使君之雨使君勿去我民
父母視事三年戶口增數倍一郡饒足克勤為治以德
化為本不喜近名嘗曰近名必立威立威必殃民吾不
忍也自奉簡素一布袍十年不易日不再肉食太祖用
法嚴士大夫多被謫過濟寧者克勤輒周恤之永嘉侯
朱亮祖嘗率舟師赴北平水涸役夫五千濬河克勤不

能止泣禱于天忽大雨水深數尺舟遂達民以為神八年入朝太祖嘉其績賜宴遣還郡尋為屬吏程貢所誣謫役江浦復以空印事連逮死于孝聞孝孺孝聞十三喪母蔬食終制孝孺自有傳

吳履字德基蘭谿人少受業于聞人夢吉通春秋諸史李文忠鎮浙東聘為郡學正久之舉于朝授南康丞南康俗悍謂丞儒也易之居數月摘發奸伏如老獄吏則皆大驚相率斂跡履乃改崇寬大與民休息知縣周以

中巡視田野為部民所詈捕之不獲怒盡繫其鄉鄰履
閱獄問故立釋之乃白以中以中益怒曰丞慢我履曰
犯公者一人耳其鄰何罪今繫者衆而捕未已急且有
變奈何以中意乃解邑有淫祠每祀輒有蛇出戶民指
為神履縛巫責之沈神像于江淫祠遂絕為丞六年百
姓愛之遷安化知縣大姓易氏保險自守江陰吳侯良
將繫之召履計事履曰易氏逃死耳非反也招之當來
不來誅未晚良從之易氏果至良欲籍農故為兵者民

大恐履曰世清矣民安于農請籍其願為兵者不願可
勿強遷離州知州山東兵常以牛羊代秋稅履與民計
曰牛羊有死瘠患不若輸粟便他日上官令民送牛羊
之陝西他縣民多破家離民獨完會改州為縣召履還
離民皆涕泣奔送履遂乞骸骨歸是時河內丞廖欽並
以廉能稱居八年調吳江後坐事謫戍久之以老病放
歸道河內河內民競持羊酒為壽且遺之鯁須臾哀數
百疋欽固辭不得一夕遽去他若興化丞周舟以績最

特擢吏部主事民爭乞留乃遣還之歸安丞高彬曹縣
主簿劉郁衡山主簿紀維正霑化典史杜濩皆坐事以
部民乞宥復其官而惟正立擢陝西參議其後州縣之
佐貳知名者在仁宣時則易州判官張有聞壽州判官
許敏許州判官王通靈璧丞田誠安平丞耿福緣嘉定
丞戴肅大名丞賀禎昌邑主簿劉整襄垣主簿喬育貴
池典史黃金蘭深澤典史高聞英景時則養利判官汪
浩泰州判官王思旻上海丞張禎吳江丞王懋本歷城

丞熊觀黔陽主簿古初雲南南安州琅井巡檢李保或
超遷或遷任皆因部民請云

高斗南字拱極陝西徽州人貌魁梧語音若鐘洪武中
由薦舉授四川定遠知縣才識精敏多善政二十九年
與知府永州余彥誠知縣齊東鄭敏儀真康彥民岳池
王佐安肅范志遠當塗孟廉及丞懷寧蘇億休寧甘鏞
當塗趙森並坐事先後被徵其耆民奔走闕下具列善
政以聞太祖嘉之賜襲衣寶鈔遣還并賜耆民道路費

諸人既還任政績益著尋舉天下廉吏數人斗南與焉
列其名于彰善榜聖政紀以示勸九載績最擢雲南新
興知州新興人愛之不異定遠居數年以衰老乞歸薦
子吏科給事中恂自代成祖許之年七十而卒恂字士
信博學能詩文官新興從大軍征交趾有協贊功師旋
卒于官彥誠德興人初知安陸州以征稅愆期當就逮
其父老伏闕乞留太祖賜宴嘉賞遣還父老亦預宴久
之擢知永州府終河東鹽運使敏常坐事被逮部民數

千人守闕下求宥帝宴勞復其官賜鈔百錠衣三襲居數年考滿入朝部民復走京師乞再任帝從其請及是再獲宥彥民泰和人洪武二十七年進士先知青田調儀真後歷巴陵天台並著名績永樂初罷歸洪熙元年御史巡按至天台縣民二百餘人言彥民廉公有為乞還之天台慰民望御史以聞宣宗嘆曰彥民去天台二十餘年民猶思之其有善政可知乃用為江寧縣丞億庶森三人既釋還明年復以事當逮縣民又走闕下頌

其廉勤帝亦釋之時太祖操重典繩羣下守令坐小過輒逮繫聞其賢旋遣還且加賞賚有因以超擢者二十九年知縣靈壁周榮宜春沈昌昌樂于子仁丞新化葉宗並坐事逮訊部民為叩閭太祖喜立擢四人為知府榮河南昌南安子仁登州宗黃州由是長吏競勸一時多循良之績焉榮字國華蓬萊人初為靈壁丞坐累逮下刑部耆老羣赴輦下稱其賢帝賜鈔八十錠綺羅衣各一襲禮部宴榮及耆老而還之無何擢榮靈壁知縣

及知河南亦有聲後建言稱旨擢河南左布政使

史誠祖解州人洪武末詣闕陳鹽法利弊太祖納之授汶上知縣為治廉平寬簡永樂七年成祖北巡遣御史考覈郡縣長吏賢否還言誠祖治第一賜璽書勞之曰守令承流宣化所以安利元元朕統御天下夙夜求賢共圖治理往往下詢民間皆言苦吏苛急能副朕心者實鮮爾敦厚老成恪共乃職持身勵志一于廉公平賦均徭政清訟簡民心悅戴境內稱安方古良吏亦復何

讓特擢爾濟寧知州仍視汶上縣事其益共乃職慎終
如始以永嘉譽欽哉并賜內醢一尊織金紗衣一襲鈔
千貫御史又言貪吏虐民無若易州同知張騰遂徵下
獄誠祖既得旌益勤于治土田增闢戶口繁滋益編戶
十四里成祖過汶上欲徙其民數百家于膠州誠祖奏
免之屢當遷職輒為民奏留閱二十九年竟卒于任士
民哀號留葬城南歲時奉祀是時縣令多久任蠡縣吳
祥永樂時知嵩縣至宣德中閱三十二年卒于任臨汾

李信永樂時由國子生授遵化知縣至宣德中閱二十七年始擢無為知州以年老不欲赴遂乞歸涓縣房岳宣德間為鄒縣知縣至正統中閱二十餘年卒于任吏民皆愛戴之而吉水知縣武進錢本忠有廉名註誤罷官父老奔走號泣乞留郡人胡廣力保之得還任民聞本忠復來空間井迎拜永樂中卒官民哀慕留墓吉水爭負土營墳其得民如誠祖云

謝子襄名袞以字行新淦人建文中由薦舉授青田知

縣永樂七年與錢塘知縣黃信中開化知縣夏升並九載課最當遷其部民相率訴于上官乞再任上官以聞帝嘉之即擢子襄處州知府信中杭州升衢州俾得治其故縣子襄治處州聲績益著郡有虎患歲旱蝗禱于神大雨二日蝗盡死虎亦遁去有盜竊官鈔子襄檄城隍神盜方閱鈔密室忽疾風捲墮市中盜即伏罪民鬻牛于市將屠之牛逸至子襄前俯首若有訴乃捐俸贖還其主叛卒吳米據山谷為亂朝廷發兵討之一郡洵

洵子襄力止軍城中毋出而自以計掩捕之獲其魁餘
悉解散為人廉謹歷官三十年不以家累自隨二十二
年卒信中餘千人先知樂清縣奸人紿寡婦至京誣告
鄉人謀叛而已逸去有司繫其婦以聞詔行所司會鞠
信中廉得其情力詆為誣獲全者甚衆盜殺一家三人
獄久不決信中禱于神得真盜遠近稱之升鹽城人
貝秉彛名恒以字行上虞人永樂二年進士授邵陽知
縣以憂去補東阿善決獄能以禮義導民歲大侵上平

糴備荒議帝從之班下郡縣如東阿武邑西南有巨浸積潦為田害秉彛相視高下鑿渠引入大清河涸之得沃壤數百頃民食其利尤善綜畫凡廢鐵敗皮朽索故紙悉藏之暇令工匠煮膠鑄杵擣紙絞索貯于庫會成祖北巡敕有司建席殿秉彛出所貯濟用工遂速竣帝將召之東阿耆老百餘人詣闕自言願留具令帝許之九載考滿入都詔進一階仍還東阿嘗坐累罰役京師民競代其役三罰三代乃復官秉彛為吏明察而仁恕

素善飲已仕遂已之宣德元年卒官時龍溪知縣南昌
劉孟雍鄒縣知縣龍溪朱珏建安知縣崑山張準婺源
知縣建安吳春歛縣知縣江西樂平石啟宗皆有惠利
民率懷思不忘云

萬觀字經訓南昌人弱冠成永樂十九年進士帝少之
令歸肄業尋召為御史改嚴州知府府東境七里瀧有
漁舟數百艇時剽行旅觀編十舟為一甲令畫地巡警
不匝月盜屏跡乃勵學校勸農桑奏減織造以銀代絲

稅民皆便之九年考績治行為海內第一既以憂去將
除服嚴州民豫上章願復得觀為守金衢民亦上章乞
之朝廷異焉補平陽府政績益茂有芝生堯祠棟上士
民皆言使君德化所致觀曰大守知奉職而已芝非吾
事也考滿擢山東布政使卒于官

葉宗人字宗行松江華亭人永樂中尚書夏原吉治水
東南宗人以諸生上疏請濬范家港引浦水入海禁瀕
海民無作壩以遏其流帝令赴原吉所自效工竣原吉

薦之授錢塘知縣縣為浙江省會徭重豪有力往往構
黠吏得財役貧民宗人令民自占甲乙書于冊以次簽
役役乃均嘗視事有蛇升階若有所訴宗人曰爾有冤
乎吾為爾理蛇即出遣隸尾之入餅肆爐下發之得僵
屍蓋肆主殺而瘞之也又常行江中有死人挂舟舵推
問則里無賴子所沈者遂俱伏法邑民以為神按察使
周新廉介吏也尤重宗人一日伺宗人出潛入其室見
厨中惟銀魚腊一裹新嘆息攜少許去明日召宗人共

食飲至醉用儀仗導之歸時呼為錢塘一葉清十五年督工匠往營北京卒于塗新哭之累日

王源字啟澤龍巖人永樂二年擢進士授庶吉士改深澤知縣修學舍築長隄勸民及時嫁娶革其爭財之俗數上書論事被詔徵入都又論時政得失忤旨下吏會赦復官奏免逋負歲饑輒發粟振救坐是被逮民爭先輸納得贖還召為春坊司直郎侍諸王講論遷衛府紀善移松江同知奏捐積逋數十萬石以母老乞歸養服

闕除刑部郎中英宗踐阼擇廷臣十一人為知府賜宴
及敕乘傳行源得潮州府城東有廣濟橋歲久半圯壞
源斂民萬金重築之以其餘建亭設先聖四配十哲像
刻藍田呂氏鄉約擇民為約正約副約士講肄其中而
時偕僚案董率馬西湖山上有大石為怪源命鑿之果
獲石骷髏怪遂息乃琢為碑大書潮州知府王源除怪
石會杖一民死民子訴諸朝并以築橋建亭為源罪逮
至京罪當贖徒潮人相率叩閭乃復其官久之乞休潮

人奏留不獲祠祀之

翟溥福字本德東莞人永樂二年進士除青陽知縣九
華虎為患溥福檄山神虎即殄久之移新淦遷刑部主
事進員外郎為尚書魏源所器正統元年七月詔舉廷
臣堪為郡守者源以溥福應乃擢南康知府先是歲歉
民擅發富家粟及收取漂流官木者前守悉坐以盜當
死者百餘人溥福閱實杖而遣之地濱鄱陽湖舟遇風
濤無所泊為築石堤百餘丈往來者便之廬山白鹿書

院廢溥福倡衆興復延師訓其子弟朔望躬詣講授考績赴部以年老乞歸侍郎趙新嘗撫江西大聲曰翟君此邦第一賢守也胡可聽其去懇請累日乃許之辭郡之日父老爭贐金帛悉不受衆挽舟涕泣因建祠湖堤祀之又配享白鹿書院之三賢祠三賢者唐李渤宋周敦頤朱子也

李信圭字君信泰和人洪熙時舉賢良授清河知縣縣瘠而衝官艘日相銜役夫動以千計前令請得沐陽五

百人為助然去家遠艱于衣食信圭請免其助役代輸
清河浮征三之二兩邑便之俗好發塚縱火信圭設教
戒十三條令里民書于牌月朔望儆戒之且令書其民
勤惰善惡以聞俗為之變宣德三年上疏言本邑地廣
人稀地當衝要使節絡繹日發民挽舟丁壯既盡役及
老穉妨廢農桑前年兵部有令公事亟者舟予五人緩
者則否今此令不行役夫無限有一舟至四五十人者
凶威所加誰敢詰問或遇快風步追不及則官舫人役

沒其所齎衣糧俾受寒餒乞申明前令哀此憚人從之
八年春又言自江淮達京師沿河郡縣悉令軍民挽舟
若無衛軍則民夫盡出有司州縣歲發二三千人晝夜
以俟而上官又不分別雜泛差役一體派及致土田荒
蕪民無蓄積稍遇歉歲輒老穉相攜緣道乞食實可憫
傷請自儀真抵通州盡免其雜徭俾得盡力農田蕪供
夫役帝亦從之自是他郡亦蒙其澤正統元年用侍郎
章敞薦擢知蘄州清河民詣闕乞留命以知州理縣事

民有湖田數百頃為淮安衛卒所奪民代輸租者六十年信圭奏之詔還民饑民攘食人一牛御史論死八人信圭奏之免六人天久雨淮水大溢沒廬舍畜產甚衆信圭奏請振貸并停歲辦物件及軍匠厨役濬河人夫報可南北往來道死不塋者信圭為三大塚塋之十一年冬尚書金滙薦擢處州知府其在清河已二十二年矣處州方苦旱信圭至輒雨未幾卒于官清河民為立祠祀之自明興至洪宣正統間民淳俗厚吏易為治而

其時長吏亦多勵長者行以循良見稱其秩滿奏留者不可勝紀略舉數人列于篇孫浩永樂中知邵陽遭喪去官洪熙元年陝西按察使頌浩前政請令補威寧宣宗嘉嘆即命起復久之超擢辰州知府薛慎知長清以親喪去洪熙元年九月長清民知慎服闋相率詣京師乞再任吏部尚書蹇義以聞言長清別除知縣已久即如民言又當更易帝曰國家置守令但欲其得民心苟民心不得雖屢易何害遂還之吳原知吳橋洪熙中

九載考績赴部縣民詣闕乞留帝從之陳哲知博野以舊官還職解去宣德元年部民懇訴于巡按御史乞還哲御史以聞報可暢宣知泰安以母憂去民頌于副使鄭埜以聞仁宗命服闋還任宣德改元宣服闋吏部以請帝曰民欲之監司言之固當從況有先帝之命乎遂如其請劉伯吉知碭山以親喪去服除碭山民守闕下求再任吏部言新令已在碭山二年矣帝曰新者勝舊則民不復思今而又思其賢于新者可知矣遂易之

孔公朝永樂時知寧陽坐與同僚飲酒忿爭並遣戍部
民屢叩閭乞還皆不許宣德二年詔求賢有以公朝薦
者寧陽人聞之又相率叩閭乞公朝帝顧尚書蹇義曰
公朝去寧陽已二十餘載民奏乞不已此非良吏耶可
即與之郭元知會寧為奸人所訐被逮里老伏闕訟冤
乞還帝亦許之徐士宗知貴溪宣德六年三考俱最民
詣闕乞留詔增二秩還任郭南知常熟正統十二年以
老致仕父老乞還任英宗許之張璟知平山秩滿士民

乞留英宗命進秩復任景泰初母憂去復從士民請奪情視事徐榮知藁城親喪去官服闋部民乞罷新令而還榮英宗如其請景泰初秩滿復徇民請留之何澄知安福被劾民詣闕乞留英宗命還任乃築寅陂浚渠道復密湖之舊大興水利秩滿當遷侍讀劉球為民代請帝復留之田玉知桐鄉丁艱去英宗以部民及巡撫周忱請還其任其他若內邱馬旭桐廬楊信北流李禧洋縣王黼保安張庸獲鹿吳韞扶風宋端皆當宣宗之世

以九載奏最為民乞留即加秩留任者也時帝方重循良而吏部尚書蹇義尤慎擇守令考察明恕沿及英宗吏治淳厚部民奏留率報可然其間亦有作奸者永寧稅課大使劉迪剗羊置酒邀耆老請留宣宗怒下之吏漢中同知王聚亦張宴求屬吏使奏為知府事聞宣宗并屬吏罪之自後部民奏留率下所司覈實云

張宗璉字重器吉水人永樂二年進士改庶吉士授刑部主事錄囚廣東仁宗即位擢左中允會詔朝臣舉所

知禮部郎中況鍾以宗璉名上帝問少傅楊士奇曰人皆舉外吏鍾舉京官何也對曰宗璉賢臣與侍讀學士王直將舉之不意為鍾所先耳帝喜曰鍾能知宗璉亦賢矣由是知鍾而擢宗璉南京大理丞宣德元年詔遣吏部侍郎黃宗載等十五人出釐各省軍籍宗璉往福建明年坐奏事忤旨謫常州同知朝遣御史李立理江南軍籍檄宗璉自隨立受點軍詞多逮平民實伍宗璉數爭之立怒宗璉輒卧地乞杖曰請代百姓死免株累

甚衆初宗璉使廣東務廉恕至是見立暴橫心積不平
疽發背卒常州民白衣送喪者千餘人爲建祠君山宗
璉蒞郡不攜妻子病亟召醫室無燈燭童子從外索取
油一盂入宗璉立却之其清峻如此

李驥字尚德郟城人舉洪武二十六年鄉試入國學居
三年授戶科給事中時闕市譏商旅發及囊篋驥奏止
之尋坐事免建文時薦起新鄉知縣招流亡給以農具
復業者數千人內艱去官民相率奏留者數四不許永

樂初服闋改知東安事有病民輒奏于朝罷免之有嫠婦子齧死訴于驥驥禱城皇神深自咎責明旦狼死于其所侍郎李昶等交薦擢刑部郎中奏陳十餘事多見採納坐累謫役保安洪熙時有詔求賢薦為御史陳經國利民十事仁宗嘉納宣德五年巡視倉場軍高祥盜倉粟驥執而鞫之祥父妄言祥與張貴等同盜驥受貴等賄故獨罪祥刑部侍郎施禮遂論驥死驥上章自辨帝曰御史既禽盜安肯納賄命偕都察院再訊驥果枉

帝乃切責禮而復驥官其年十一月擇廷臣二十五人
為郡守奉敕以行驥授河南知府肇慶則給事中王瑩
瓊州則戶部郎中徐鑑汀州則禮部員外郎許敬軒寧
波則刑部主事鄭恪撫州則大理寺正王昇後皆以政
績著河南境多盜驥為設火甲一戶被盜一甲償之犯
者大署其門曰盜賊之家又為勸教文振木鐸以徇之
自是人咸改行道不拾遺郡有伊王府王數請囑不從
中官及校卒虐民又為驥所抑恨甚及至冬令驥以四

更往陪位行禮及驥如期往誣驥後期執而桎梏之次
日乃釋驥奏聞帝怒貽書讓王府中丞奉長史典儀悉
逮置于理驥持身端恪晏居雖几席必正蒞郡六年卒
年七十士民赴弔咸哭失聲王瑩鄞人起家舉人居肇
慶九年進秩二等後徙知西安徐鑑宜興人在瓊四年
卒郡人祀之九賢祠許敬軒天台人起家國子生守汀
時糾參政陳羽貪暴宣宗為逮治羽卒官士民爭賻之
魏恪閩縣人起家進士守寧波以艱去會海寇入犯民

數千詣闕乞留詔奪情復任嘗劾中使呂可烈無狀帝
為許可烈久之擢浙江參政王昇龍溪人起家進士在
郡九載以部民乞留增秩還任以疾歸

李湘字永懷泰和人永樂中由國子生理刑都察院以
才擢東平知州常祿外一無所取訓戒吏民若家人然
城東有大村壩源出岱嶽雨潦輒為民患奏發丁夫隄
之州及所轄五邑地多荒蕪力督民墾闢公私皆實會
舊官還任將解去民羣乞于朝帝從其請成祖晚年數

北征令山東長吏督民轉餉道遠多死亡惟東平人無
失所奸人誣湘苛斂民財訐于布政司縣民千三百人
走訴巡按御史暨布按二司力白其冤耆老七十人復
奔伏闕下發奸人誣陷狀及布政司繫湘入都又有耆
老九十人隨湘訟冤通政司以聞下刑曹閱實乃復湘
官而抵奸人于法蒞州十餘年至正統初詔大臣舉郡
守尚書胡濙以湘應遂擢懷慶知府東平民扶攜老幼
泣送數十里懷慶有軍衛素挾勢厲民湘隨時裁制皆

不敢犯居三年卒

趙豫字素定安肅人燕王起兵下保定豫以諸生督賦
守城永樂五年授泌陽主簿未上擢兵部主事進員外
郎內艱起復洪熙時進郎中宣德五年五月簡廷臣九
人為知府豫得松江奉敕往時衛軍恣橫豫執其尤者
杖而配之邊衆遂帖然一意拊循與民休息擇良家子
謹厚者為吏訓以禮法均徭節費減吏員十之五巡撫
周忱有所建置必與豫議及清軍御史李立至專務益

軍勾及姻戚同姓稍辨則酷刑拷掠人情大擾訴枉者至一千一百餘人鹽司勾竈丁亦累及他戶大為民害豫皆上章極論之咸獲蘇息有詔減蘇松官田重租豫所轄華亭上海二縣減去十之二三正統中九載考績民五千餘人列狀乞留巡按御史以聞命增二秩還任及十年春大計羣吏始舉卓異之典豫與寧國知府袁旭皆預焉賜宴及襲衣遣還在職十五年清靜如一日去郡老穉攀轅留一履以識遺愛後配享周忱祠方豫

始至患民俗多訟訟者至輒好言諭之曰明日來衆皆笑之有松江大守明日來之謠及訟者踰宿忿漸平或被勸阻多止不訟始與豫同守郡者蘇州沈鍾常州莫愚吉水陳本深温州何文淵杭州馬儀西安羅以禮建昌陳鼎並皦皦著名績豫尤以愷悌稱是時列郡長吏以惠政著聞者湖州知府祥符趙登秩滿當遷民詣闕乞留增秩再任自宣德至正統先後在官十七年登同里岳璿繼之亦有善政民稱為趙岳淮安知府南昌彭

遠被誣當罷民擁中官舟乞為奏請宣帝命復留之正
統六年超擢廣東布政司荊州知府大庾劉永遭父喪
軍民萬八千餘人乞留英宗命奪情視事鞏昌知府鄧
縣戴浩擅發邊儲三百七十石振饑被劾請罪景帝原
之徽州知府孫遇秩滿當遷民詣闕乞留英宗令進秩
視事先後在官十八年遷至河南布政使惟表旭在寧
國為督學御史程富所誣劾逮死獄中而寧國人惜之
立祠祀焉

曾泉泰和人永樂十八年進士選庶吉士改御史宣德
初都御史邵玘甄別屬察泉謫汜水典史卒正統四年
河南參政孫原貞上言泉操行廉潔服官勤敏不以降
黜故有偷情心躬督民闢荒土收穀麥伐材木備營繕
通商賈完逋責官有儲積民無科擾造舟楫置棺槨贍
民器用百姓婚喪不給者咸資于泉死之日老幼巷哭
臣行部汜水泉沒已三年矣民懷其惠言輒流涕雖古
循吏何以加茲若使海內得泉等數十人分治郡邑可

使朝廷恩澤滂流物咸得所雖在異代猶宜下詔褒美而獎錄未及官階未復使衆終蒙貶謫之名不獲顯于當世良可矜恤請追復衆爵褒既往以風方來帝從之范衷字恭肅豐城人永樂十九年進士除壽昌知縣開荒田二千六百畝興水利三百四十有六區正統五年三考報最當遷邑人頌德乞留御史以聞朝廷許之尋以外艱去服闋起知汝州吏部尚書王直察舉天下廉吏數人衷為第一性至孝廬父墓瓜生連枝有白兔三

馴擾墓側鄉人莫不高其行

周濟字大亨洛陽人永樂中以舉人入大學歷事都察院都御史劉觀薦為御史固辭宣德時授江西都司斷事艱歸補湖廣正統初擢御史大同鎮守中官以驕橫聞敕濟往廉之濟變服負薪入其宅盡得不法狀還報帝大嘉之已巡按四川威州土官董敏王允相仇殺詔濟督官兵進討濟曰朝廷綏安遠人宜先撫而後征馳檄諭之遂解十一年出為安慶知府歲比不登民間鬻

子女充衣食方舟而去者相接濟借漕糧以振而禁鬻
子女者且上疏請免租詔許之全活甚衆又為定婚喪
制禁侈費慫嫁塋期者有罰風俗一變饑民聚掠富家
粟富家以盜劫告濟下令曰民饑故如此然得穀當報
太守數太守當代爾償掠者遂解散濟卒官民皆罷市
巷哭云

范希正字以貞吳縣人宣德三年舉賢良方正授曹縣
知縣有奸吏受賕希正按其罪械送京師吏反誣希正

他事坐逮曹民八百餘人詣京白通政司言希正庶能橫為奸吏誣枉侍郎許廓以公事過曹曹父老二百餘人遮道稽顙泣言朝廷奪我賢令事並聞帝乃釋希正使還縣正統十年山東饑惟曹以希正先積粟得無患大理寺丞張驥振山東聞之因請升曹縣為州而以希正為知州從之時州民負官馬不能償多逃竄希正節公費代償九十餘匹逃者皆復業吉水人誣曹富民殺其兄連坐甚衆希正密移吉水按其人姓名皆妄事得

白治曹二十二年歷知州再考乃致仕當是時潞州知州咸寧燕雲徐州知州楊祕全州知州錢塘周健霸州知州張需定州知州王約皆大著聲績祕健進秩視事約賜詔旌異需忤太監王振戍邊人尤惜之而得民最久者無若希正與寧州知州劉綱綱字之紀禹州人建文二年進士由府谷知縣遷是職蒞州三十四年仁宗嘗賜酒饌人以為榮正統中請老去民送之涕泣載道及卒寧民祀之狄仁傑祠中其孫即大學士宇也

我堅字可大蘭州人早歲受書即有志聖賢舉于鄉入
國子監景泰元年上書請悉徵還四方監軍罷天下佛
老宮疏奏不行五年成進士授福山知縣刊布小學俾
士民講誦俗素陋至是一變村落皆有絃誦聲成化初
賜敕旌異超擢萊州知府期年化大行以憂去服除改
知南陽召州縣學官具告以古人為學之指使轉相勸
誘創志學書院聚秀民講說五經要義及濂洛諸儒遺
書建節義祠祀古今烈女訟獄徭賦務底于平居數年

大治引疾去士民號泣送者踰境不絕及聞其卒立祠
春秋祀之堅之學私淑河東薛瑄務致知而踐其實不
以諛聞取譽故能以儒術飾吏治子晃進士翰林檢討
諂附蕉芳劉瑾敗落職隕其家聲焉

陳鋼字堅遠應天人舉成化元年鄉試授黔陽知縣楚
俗居喪好擊鼓舞鋼教以歌古哀詞民俗漸變縣城
當沅湘合流數決壞廬舍鋼募人採石甃隄千餘丈水
不為害南山厓官道數里徑窄甚行者多墮厓死鋼積

薪燒山沃以醯拓徑丈許行者便之銅病民爭籲神願減已算益銅壽遷長沙通判監修吉王府第工成王賜之金帛不受請王故殿材修岳麓書院王許之弘治元年丁母憂歸卒黔陽長沙並祠祀之子沂官侍讀見文苑傳

丁積字彥誠寧都人成化十四年進士授新會知縣至即師事邑人陳獻章為政以風化為本而主于愛民中官梁芳邑人也其弟長橫于鄉責民逋過倍復訴于積

積追券焚之且收捕繫獄由是權豪屏跡申洪武禮制參
以朱子家禮擇耆老誨導百姓良家子墮業聚廡下
使目誦小學書親為解說風俗大變民出錢輸官供役
名均平錢其後吏貪復令甲首出錢供用曰當月錢貧
者至鬻子女積一切杜絕俗信巫鬼為痛毀淫祠既而
歲大旱築壇圭峯頂昕夕伏壇下者八日雨大澍而積
遂得疾以卒士民聚哭于途有一嫗夜哭極哀或問之
曰來歲當甲首丁公死吾無以聊生矣

田鐸字振之陽城人成化十四年進士授戶部主事遷
員外郎郎中弘治二年奉詔振四川生誤遺敕中語謫
蓬州知州州東南有江洲八十二頃為豪右所據鐸悉
以還民建大小二十四橋又鑿三溪山以便行者御史
行部至蓬寂無訟者訝之已乃知州無冤民也太息而
去薦于朝擢廣東僉事遷四川參議不赴以老疾告歸
正德時劉瑾矯詔言鐸理廣東鹽法簿牒未明速赴廣
未就道而瑾誅或勸鐸毋行鐸不聽行次九江卒年八

十二矣

唐侃字廷直丹徒人正德八年舉于鄉授永豐知縣之
官不攜妻子獨與一二童僕飯蔬豆羹以居久之吏民
信服永豐俗刁訟尚鬼尤好俳優侃禁止之進武定知
州會清軍籍應發者至萬二千人侃曰武定戶口三
萬是空半州也力爭之又有議徙州境徒駭河者侃復
言不宜服民財填溝壑事竝得寢章聖皇太后葬承天
諸內奄迫脅所過州縣吏索金錢宣言供張不辦者死

州縣吏多逃侃置空棺旁舍中奄迫之急則給至棺所指而告之曰吾辦一死金錢不可得也諸奄皆愕眙去稍遷刑部主事辛初侃少時從丁璣學鄰女夜奔之拒弗納其父坐繫侃請代不得藉草寢地逾歲父獲宥乃止其操行貞潔蓋性成也

湯紹恩安岳人父佐弘治初進士仕至參政紹恩以嘉靖五年擢第十四年由戶部郎中遷德安知府尋移紹興為人寬厚長者性儉素內服疏布外以父所遺故袍

襲之始至新學宮廣設社學歲大旱徒步禱烈日中雨
即降緩刑罰恤貧弱旌節孝民情大和山陰會稽蕭山
三邑之水匯三江口入海潮汐日至擁沙積如邱陵遇
霖潦則水阻沙不能驟洩良田盡成巨浸當事者不得
已決塘以瀉之塘決則憂旱歲苦修築紹恩遍行水道
至三江口見兩山對峙喜曰此下必有石根余其於此
建閘乎募善水者探之果有石脈橫亘兩山間遂興工
先投以鐵石繼以籠盛甃屑沉之工未半潮衝蕩不能

就怨謫煩興紹恩不為動禱于海神潮不至者累日工
遂竣修五十餘尋為閘二十有八以應列宿于內為備
閘三曰經淩曰撞塘曰平水以防大閘之潰閘外築石
隄四百餘丈扼潮始不為閘患刻水則石間俾後人相
水勢以時啟閉自是三邑方數百里間無水患矣士民
德之立廟閘左歲時奉祀不絕屢遷山東右布政使致
仕歸年九十七而卒初紹恩之生也有峨嵋僧過其門
曰他日地有稱紹者將承是兒恩乎因名紹恩字汝承

其後果驗

徐九思貴溪人嘉靖中授句容知縣始視事恂恂若不
能俄有吏袖空牒竊印者九思摘其奸論如法郡吏為
叩頭請不許於是人人惴恐為治于單赤務加恩而御
豪猾特嚴訟者扶不過十諸所催科預為之期逾期令
里老逮之而已隸莫敢至鄉落縣東西通衢七十里塵
土積三尺雨雪泥沒股九思節公費覓以石行旅便之
朝廷數遣中官醮神三茅山縣民苦供應九思搜故牒

有鹽引金久貯于府者請以給賞民無所擾歲侵穀湧
貴巡撫發倉穀數百石使平價糶而償直於官九思曰
彼糶者皆豪也貧民雖平價不能糶乃以時價糶其半
還直於官而以餘穀煮粥食餓者穀多則使稱力分負
以去其山谷遠者則就旁富人穀而官為償之全活甚
衆嘗曰即天子布大惠安能人人蠲租賜復第在吾曹
酌緩急而已久之與應天府尹不合為巡撫所劾吏部
尚書熊浹知其賢特留之積九載遷工部主事歷郎中

治張秋河道漕河與鹽河近而不相接漕水溢則泛濫
為田患九思議築減水橋於沙灣俾二水相通漕水溢
則有所洩以入海而不侵田少則有所限而不至於涸
工成遂為永利時工部尚書趙文華視師東南道河上
九思不出迎遣一吏齎牒往謁文華嫚罵而去會遷高
州知府文華歸修舊怨與吏部尚書吳鵬合謀構之遂
坐九思老致仕旬容民為建祠茅山九思家居二十二
年年八十五抱疾抗手曰茅山迎我遂卒子貞明自有

傳

龐嵩字振卿南海人嘉靖十三年舉于鄉講業羅浮山從遊者雲集二十三年授應天通判進治中先後凡八年府缺尹屢攝其事始至值歲饑上官命督振公粟竭貸之巨室富家全活者六萬七千餘人乃蠲積逋緩征徭勤勞徠復業者又十萬餘人留都民苦役重力為調劑凡優免戶及寄居客戶詭稱官戶寄莊戶女戶神帛堂匠戶俾悉出以供役民困大蘇江寧縣葛仙永豐二

鄉頻遭水患居民止存七戶嵩為治隄築防得田三千
六百畝立惠民莊四召貧民佃之流移盡復屢剖冤獄
戚畹王湧舉人趙君寵占良人妻殺人嵩置之法早遊
王守仁門淹通五經集諸生新泉書院相與講習歲時
單騎行縣以壺漿自隨京府佐貳鮮有舉其職者至嵩
以善政特開府官在六年京察例而復與外察嵩謂非
體疏請止之遂為永制遷南京刑部員外郎進郎中撰
原刑司刑祥刑明刑四篇曰刑曹志時議稱之遷雲南

曲靖知府亦有政聲中察典以老罷而年僅五十復從
湛若水游久之卒應天曲靖皆祀之名宦葛仙鄉專祠
祀之

張淳字希古桐城人隆慶二年進士授永康知縣吏民
素多奸黠連告罷七令淳至日夜閱案牘訟者數千人
剖決如流吏民大駭服訟浸減凡赴控者淳即示審期
兩造如期至片晷分析無留滯鄉民裹飯一包即可畢
訟因呼為張一包謂其敏斷如包拯也巨盜盧十八剽

庫金十餘年不獲御史以屬淳淳刻期三月必得盜而請御史月下數十檄及檄累下淳陽笑曰盜遁久矣安從捕寢不行吏某婦與十八通吏頗為耳目聞淳言以告十八十八意自安淳乃令他役詐告吏負金繫吏獄密召吏責以通盜死罪復教之請以婦代繫而已出營貨以償十八聞亟往視婦因醉而禽之及報御史僅兩月耳民有睚眦嫌輒以人命訟淳驗無實即坐之自是無誣訟者永人貧生女多不舉淳勸誠備至貧無力者

捐俸量給全活無數歲旱劫掠公行下令劫奪者死有
奪五斗米者淳侔取死囚杖殺之而榜其罪曰是劫米
者衆皆懾服久之以治行第一赴召去永甫就車顧其
下曰某盜已來去此數里可為我縛來如言跡之盜正
濯足於河繫至盜服辜永人駭其事謂有神告淳曰此
盜捕之急則遁今聞吾去乃歸耳以理卜何神之有擢
禮部主事歷郎中謝病去起建寧知府進浙江副使時
浙江有召募兵撫按議散之兵皆洶洶淳曰是憍悍者


留則有用汰則巨測不若汰其老弱而留其壯勇則留者不思亂汰者不能亂矣從之事遂定官終陝西布政陳幼學字志行無錫人萬厯十七年進士授確山知縣政務惠民積粟萬二千石以備荒墾萊田八百餘頃給貧民牛五百餘頭覈黃河退地百三十餘頃以賦民里婦不能紡者授紡車八百餘輛置屋千二百餘間分處貧民建公廨八十間以居六曹吏俾食宿其中節公費六百餘兩代正賦之無徵者栽桑榆諸樹三萬八千餘

株開河渠百九十八道布政使劉渾成弟燦成助妾殺妻治如律行太僕卿陳耀文家人犯法立捕治之汝寧知府邱度慮幼學得禍言於撫按調繁中年秋成時飛蝗蔽天幼學捕蝗得千三百餘石乃不為災縣故土城卑且圯給饑民粟俾修築工成民不知役縣南荒地多茂草根深難墾令民投牒者必入草十斤未幾草盡得沃田數百頃悉以畀民有大澤積水占膏腴地二十餘里幼學疏為河者五十七為渠者百三十九俱引入小

清河民大獲利大莊諸里多水為築隄十三道障之給
貧民牛種貧婦紡具倍於確山越五年政績茂著以不
通權貴當考察拾遺掌道御史擬斥之其子爭曰兒自
中州來咸言中牟治行無雙今予殿何也乃已稍遷刑
部主事中官採御園果者怒殺園夫毋棄其屍河中幼
學具奏逮置之法嘉興人袁黃妄批削四書書經集註
名曰刪正刊行於時幼學駁正其書抗疏論列疏雖留
中鏤板盡毀以員外郎恤刑畿輔出於疑三百餘人進

郎中遷湖州知府甫至即捕殺豪惡奴有施敏者士族
子楊陞者人奴也橫郡中幼學執敏置諸獄敏賂貴人
囑巡撫檄取親鞠幼學執不予立杖殺之敏獄辭連故
尚書潘季馴子廷圭幼學言之御史疏劾之下獄他奸
豪復論殺數十輩獨楊陞畏禍斂跡置之已念己去陞
必復逞遂捕置之死一郡大治霖雨連月禾盡死幼學
大舉荒政活饑民三十四萬有奇御史將薦之徵其治
行推官閻世科列上三十六事御史以聞詔加按察副

使仍視郡事久之以副使督九江兵備幼學年已七十其母尚在遂以終養歸母卒不復出天啟三年起南京光祿少卿改太常少卿俱不赴明年卒年八十四矣中年湖州並祠祀之



欽定四庫全書

明史卷二百八十一考證

方克勤傳台州盜起吳江同知金剛努奉行省命募水
兵禦之克勤獻賊弗納

臣方煒按是時行省募民

為水兵克勤詣金剛努謂曰民皆有盜心奈何授之
兵弗聽既而果叛去金剛努踰垣走未幾左達勒實
哩至郡招諭都事劉基為之副克勤陳勦殄方謂不
可姑息基避之亦不能用見識大錄所謂獻策者指

此謹附識

方克勤傳盛夏守將督民夫築城克勤曰民方耕耘不暇奈何重困之畚鍤請之中書省得罷

臣方煒按

克勤為郡會歲暮轉戎衣於燕時有令役民舟者誅他郡以牛車從事天寒牛僵民苦之請以舟僚佐懼弗敢克勤曰吾知便民耳抵法奚悔焉卒載以舟而白之行省省臣義弗問見獻徵錄謹附識

方克勤傳尋為屬吏程貢所誣

臣

方煒按貢嘗知曹

縣以不職被笞銜克勤甚因上書詆之詔御史楊甲
廉按甲貢故人也索克勤過無所得乃誣其私用倉
中炭葦被逮子孝孺上書政府願以身贖不報遂謫
役江浦見識大錄謹附識

吳履傳

廖欽等附

河內丞廖欽並以廉能稱

臣方煒

按欽任吳江秩滿既去會河內舊虧課錢典守者以
誣欽欽弗辨謫役鳳陽旋釋歸未幾為里人誣構謫
戍富峪以老病還復起為袁州學官永樂初詔求文

學士解縉胡廣以欽薦召授檢討尋致仕歸見識大

錄謹附識

吳履傳 廖欽等附

靈璧丞田城

臣方煒按是時田

誠九載滿縣人乞留因擢州判官丞靈璧如故
見明實錄謹附識

吳履傳 廖欽等附

貴池典史黃金蘭

臣方煒按是時

即擢金蘭為本縣令見明實錄謹附識

史誠祖傳誠祖既得旌益勤於治

臣方煒按誠祖被

旌後成祖遣錦衣偵之見其甌無斗粟衣冠粗敝乃
加四品服俸見識大錄謹附識

貝秉彝傳上年糴備荒議

臣方煒按秉彝在東阿歲

屢豐常建議於朝請平糴為預備計從之仍下其法
行之近州縣見識大錄謹附識

貝秉彝傳會成祖北巡敕有司建席殿秉彝出所貯濟

用工遂速竣

臣方煒按成祖北巡時敕河南山東

西民丁隨軍供饋餉各遣官率之他郡邑率規避東

彞曰天子親行臣下敢憚勞耶即就道民忻躍以從
訖事而民無失者見獻徵錄謹附識

葉宗人傳授錢塘知縣 臣方煒按宗人為令時邑故

多虎患宗人為文驅之遂斂迹仁宗在東宮聞其治
行令所司優遇之見獻徵錄謹附識

李信圭傳授清河知縣 臣方煒按宣德中歲旱飛蝗

為災信圭禱於神蝗不入境有留守衛卒姬泰者自
閩還挾貲為同舟所害過清河以病死告冀得自掩

信圭發其奸誅之並見獻徵錄謹附識

李信圭傳

孫浩等附

徐士宗知貴溪宣德六年三考俱

最民詣闕乞留召增二秩還任

臣

方煒按是時與

士宗並增秩者為扶風令宋端許州牧魏儀見明實

錄謹附識

李驥傳陳經國利民十事

臣

方煒按所陳十事明實

錄諸事均無可考謹識

李驥傳

王瑩等附

王昇龍溪人起家進士在郡九載以

部民乞留增秩還任

臣方煒按昇永樂二年進士

改庶吉士旋授江西安福令改知羅田三載歷大理
評事左寺正以少傅楊士奇之薦出知撫州見獻徵
錄謹附識

趙豫傳大計羣吏始舉卓異之典豫與寧國知府袁旭
皆豫焉 臣方煒按是年正月命吏部都察院會同

禮部察來朝司府官令各察所屬治行具最以聞見

明實錄謹附識

趙豫傳

趙登等附

湖州知府趙登

臣方煒按登由永

樂二年進士授禮部給事中三年以言事謫忠州判官十餘年稍遷安寧州知州宣德改元超擢湖州知府見李濂所撰傳謹附考

周濟傳都御史劉觀薦為御史固辭

臣方煒按宣德

時帝嘗怒宮中陳某下都察院鞠治御史嚴繼先輩莫測上意咸避之濟立訊成獄觀由此異之見獻徵錄謹附識

周濟傳十一年出為安慶知府

臣方煒按明實錄濟

於正統十年秋出巡鳳陽事竣會安慶以民饑聞遂於十一月夏出守安慶傳未詳載謹附識

范希正傳因請升曹縣為州而以希正為知州

臣方

煒按曹縣之升為州在正統十一年見地理志謹附識

范希正傳

劉剛附

而得民最久者無若希正與陝西寧

州知州劉剛

臣方煒按地理志寧州有三一屬陝

西慶陽一屬江西南昌一屬雲南臨安此所載未晰
下三行稱寧民祀之狄仁傑祠中考唐書仁傑傳及
陝西名宦志仁傑嘗為寧州刺史又一統志慶陽府
寧州有仁傑祠則剛所益實陝西之寧州矣謹擬增
并改刊四行

丁積傳授新會知縣

臣方煒按積令新會時嘗為民

辨冤許當道指繫獄民爭為致賄戒之曰吾求無愧
此心耳慎勿妄求貽我羞未幾事亦解見識大錄謹

附識

唐侃傳永豐俗刁訟尚鬼尤好俳優禁止之

臣方

煒按侃令永豐時署牌於庭左曰從刑右曰從化久之民無趨左者告訐之風一變見獻徵錄謹附識

唐侃傳稍遷刑部主事

臣方煒按識大錄侃所遷為

南京刑部謹附識

徐九思傳徐九思貴溪人

臣方煒按九思識大錄獻

徵錄陳仁錫所撰傳俱作九經與此異謹附考

徐九思傳吏部尚書熊浹知其賢特留之

臣方煒按

九思嘗權稅荊州裁舊額三之一諸聽權者紛集倍
溢於故悉置其餘於庫見識大錄謹附識

明史卷二百八十一考證

欽定四庫全書

史部

明史卷二百八十三

給事中^臣劉湄覆勘

總校官編修^臣朱鈴

欽定四庫全書

明史卷二百八十二

太學士張廷玉等奉 敕修

列傳第一百七十

儒林

方自司馬遷班固創述儒林著漢興諸儒修明經藝之
由朝廷廣厲學官之路與一代政治相表裏後史沿其
體襲士之抱遺經以相授受者雖無他事業率類次為

篇宋史判道學儒林為二以明伊洛淵源上承洙泗儒
宗統緒莫正于是所闕于世道人心者甚鉅是以載籍
雖繁莫可廢也明太祖起布衣定天下當干戈搶攘之
時所至徵召耆儒講論道德修明治術興起教化煥乎
成一代之宏規雖天亶英姿而諸儒之功不為無助也
制科取士一以經義為先網羅碩學嗣世承平文教特
盛大臣以文學登用者林立朝右而吳宗之世河東薛
瑄以醇儒預機政雖弗究于用其清修篤學海內宗焉

吳與弼以名儒被薦天子修幣聘之殊禮前席延見想
望風采而譽隆于實詬許叢滋自是積重甲科儒風少
替白沙而後曠典缺如原夫明初諸儒皆朱子門人之
支流餘裔師承有自矩矱秩然曹端胡居仁篤踐履謹
繩墨守儒先之正傳無敢改錯學術之分則自陳獻章
王守仁始宗獻章者曰江門之學孤行獨詣其傳不遠
宗守仁者曰姚江之學別立宗旨顯與朱子背馳門徒
徧天下流傳逾百年其教大行其弊滋甚嘉隆而後篤

信程朱不遷異說者無復幾人矣要之有明諸儒衍伊
雒之緒言探性命之奧旨錙銖或爽遂啟岐趨齟齬承
謫指歸彌遠至專門經訓授受源流則二百七十餘年
間未聞以此名家者經學非漢唐之精專性理嚴宋元
之糟粕論者謂科舉盛而儒術微殆其然乎今差別其
人準前史例作儒林傳有事功可見列于正傳者茲不
復及其先聖先賢後裔明代亟為表章衍聖列爵上公
與國終始其他簪纓逢掖奕葉承恩亦儒林盛事也考

其原始別自為篇附諸末簡以備一代之故云

范祖幹

葉儀等

謝應芳

汪克寬

梁寅

趙汭

陳謨

薛瑄

閻禹錫

周蕙等

胡居仁

余祐

蔡清

陳琛

林希元等

羅欽順

曹端

吳與弼

胡九韶等

陳真晟

呂柟

呂潛等

邵寶

王問

楊廉

劉觀

孫鼎
李中

馬理

魏校

王應電
王敬臣

周瑛

潘府

崔銑

何瑋

唐伯元

黃淳耀

弟淵耀

范祖幹字景先金華人從同邑許謙遊得其指要其學以誠意為主而嚴以慎獨持守之功太祖下婺州與葉

儀並召祖幹持大學以進太祖問治道何先對曰不出
是書太祖命剖陳其義祖幹謂帝王之道自修身齊家
以至治國平天下必上下四旁均齊方正使萬物各得
其所而後可以言治太祖曰聖人之道所以為萬世法
吾自起兵以來號令賞罰一有不平何以服衆夫武定
禍亂文致太平悉是道也深加禮貌命二人為諮議祖
幹以親老辭歸李文忠守處州特加敬禮恒稱之為師
祖幹事親孝父母皆八十餘而終家貧不能塋鄉里共

為營辦悲哀三年如一日有司以聞命表其所居曰純孝坊學者稱為純孝先生葉儀字景翰金華人受業于許謙謙誨之曰學者必以五性人倫為本以開明心術變化氣質為先儀朝夕惕厲研究奧旨已而授徒講學士爭趨之其語學者曰聖賢言行盡于六經四書其微詞奧義則近代先儒之說備矣由其言以求其心涵泳從容久自得之不可先立已意而妄有是非也太祖克婺州召見授為諮議以老病辭已而知府王宗顯聘儀

及宋濂為五經師非久亦辭歸隱居養親所著有南陽
雜藁吳沈稱其理明識精一介不苟安貧樂道守死不
變門人何壽朋字德齡亦金華人窮經守志不妄干人
洪武初舉孝廉以二親俱老辭父歿舍所居宅易地以
葬學者因其自號稱曰歸全先生同邑汪興立字師道
祖幹門人其德行與壽朋齊名而文學為優隱居教授
以高壽終

謝應芳字子蘭武進人也自幼篤志好學潛心性理以

道義名節自勵元至正初隱白鶴溪上構小室顏曰龜
巢因以為號郡辟教鄉校子弟先質後文諸生皆循循
雅飭疾異端惑世嘗輯聖賢格言古今明鑑為辨惑編
有舉為三衢書院山長者不就及天下兵起避地吳中
吳人爭延致為弟子師久之江南底定始來歸年逾七
十矣徙居芳茂山一室蕭然晏如也有司徵修郡志強
起赴之年益高學行益劬達官搢紳過郡者必訪于其
廬應芳布衣常帶與之抗禮議論必關世教切民隱而

導善之志不衰詩文雅麗蘊藉而所自得者理學為深
卒年九十七

汪克寬字德一祁門人祖華受業雙峯饒魯得勉齋黃
氏之傳克寬十歲時父授以雙峯問答之書輒有悟乃
取四書自定句讀晝夜誦習專勤異凡兒後從父之浮
梁問業于吳仲迂志益篤元泰定中舉應鄉試中選會
試以答策伉直見黜慨然棄科舉業盡力于經學春秋
則以胡安國為主而博考衆說會萃成書名之曰春秋

經傳附錄纂疏易則有程朱傳義音考詩則有集傳義
會通禮有禮經補逸綱目有凡例考異四方學士執經
門下者甚衆至正間蘄黃兵至室廬賞財盡遭焚掠簞
瓢屢空怡然自得洪武初聘至京師同修元史書成將
授官固辭老疾賜銀幣給驛還五年冬卒年六十有九
梁寅字孟敬新喻人世業農家貧自力于學淹貫五經
百氏累舉不第遂棄去辟集慶路儒學訓導居二歲以
親老辭歸明年天下兵起遂隱居教授太祖定四方徵

天下名儒修述禮樂寅就徵年六十餘矣時以禮律制度分為三局寅在禮局中討論精審諸儒皆推服書成賜金幣將授官以老病辭還結廬石門山四方士多從學稱為梁五經又稱石門先生鄰邑子初入官詣寅請教寅曰清慎勤居官三字符也其人問天德王道之要寅微笑曰言忠信行篤敬天德也不傷財不害民王道也其人退曰梁子所言平平耳後以不檢敗語人曰吾不敢再見石門先生寅卒年八十二

趙訪字子常休寧人生而姿稟卓絕初就外傳讀朱子四書多所疑難乃盡取朱子書讀之聞九江黃澤有學行往從之游澤之學以精思自悟為主其教人引而不發訪一再登門乃得六經疑義千餘條以歸已復往留二歲得口授六十四卦大義與學春秋之要後復從臨川虞集游獲聞吳澄之學乃築東山精舍讀書著述其中雞初鳴輒起澄心默坐由是造詣精深諸經無不通貫而尤邃于春秋初以聞于黃澤者為春秋師說三卷

復廣之為春秋集傳十五卷因禮記經解有屬辭比事
春秋教之語乃復著春秋屬辭八篇又以為學春秋者
必考左傳事實為先杜預陳傳良有得于此而各有所
蔽乃復著左氏補注十卷當是時天下兵起汙轉側干
戈間顛沛流離而進修之功不懈太祖既定天下詔修
元史徵汙預其事書成辭歸未幾卒年五十有一學者
稱東山先生

陳謨字一德泰和人幼能詩文邃于經學旁及子史百

家涉流探源辨析純駁犁然要于至當隱居不求仕而
究心經學之務嘗謂學必敦本莫加于性莫重于倫莫
先于變化氣質若禮樂刑政錢穀甲兵度數之詳亦不
可不講習一時經生學子多從之游事親孝友于其弟
鄉人有為不善者不敢使聞洪武初徵詣京師賜坐議
學學士宋濂待制王禕請留為國學師謨引疾辭歸屢
應聘為江淞考試官著書教授以終

薛瑄字德溫河津人父貞洪武初領鄉薦為元氏教諭

母齊夢一紫衣人謁見已而生瑄性穎敏甫就塾授之
詩書輒成誦日記千百言及貞改任滎陽瑄侍行時年
十二以所作詩賦呈監司監司竒之既而聞高密魏希
文海寧范汝舟深于理學貞乃並禮為瑄師由是盡焚
所作詩賦究心洛閩淵源至忘寢食後貞復改官鄆陵
瑄補鄆陵學生遂舉河南鄉試第一時永樂十有八年
也明年成進士以省親歸居父喪悉遵古禮宣德中服
除擢授御史三楊當國欲見之謝不往出監湖廣銀場

日探性理諸書學益進以繼母憂歸正統初還朝尚書
郭璉舉為山東提學僉事首揭白鹿洞學規開示學者
近見諸生親為講授才者樂其寬而不才者憚其嚴皆
呼為薛夫子王振語三楊吾鄉誰可為京卿者以瑄對
召為大理左少卿三楊以用瑄出振意欲瑄一往見李
賢語之瑄正色曰拜爵公朝受恩私室吾不為也其後
議事東閣公卿見振多趨拜瑄獨屹立振趨揖之瑄亦
無加禮自是銜瑄指揮其死妾有色振從子山欲納之

指揮妻不肯妾遂許妻毒殺夫下都察院訊已誣服瑄
及同官辨其寃三却之都御史王文承振旨誣瑄及左
右少卿賀祖嗣顧惟敬等故出人罪振復諷言官劾瑄
等受賄並下獄論瑄死祖嗣等末減有差繫獄待決瑄
讀易自如子三人願一子代死二子充軍不允及當行
刑振蒼頭忽泣于爨下問故泣益悲曰聞今日薛夫子
將刑也振大感動會刑科三覆奏兵部侍郎王偉亦申
抹乃免景帝嗣位用給事中程信薦起大理寺丞顏森

入犯分守北門有功尋出督貴州軍餉事竣即乞休學士江淵奏留之景泰二年推南京大理寺卿富豪殺人獄久不決瑄執寘之法召改北寺蘇州大饑貧民掠富豪粟火其居臨海避罪王文以閣臣出視坐以叛當死者二百餘人瑄力辨其誣文恚曰此老倔强猶昔然卒得減死屢疏告老不許英宗復辟拜禮部右侍郎兼翰林院學士入閣預機務王文于謙下獄下羣臣議石亨等將置之極刑瑄力言于帝獲減等論斬旋轉左侍郎

帝數見瑄所陳皆關君德事已見石亨曹吉祥亂政疏
乞骸骨帝心重瑄微嫌其老乃許之歸瑄學一本程朱
其修已教人以復性為主充養邃密言動咸可法嘗曰
自考亭以還斯道已大明無煩著作直須躬行耳有讀
書錄二十卷平易簡切皆自言其所得學者宗之天順
八年六月卒年七十有二贈禮部尚書諡文清弘治中
給事中張九功請從祀文廟詔祀于鄉已給事中楊廉
請頒讀書錄于國學俾六館誦習且請祠名詔名正學

隆慶六年允廷臣請從祀先聖廟庭其弟子閻禹錫字子與洛陽人父端舉河南鄉試第一為教諭卒禹錫方九歲哭父幾滅性長博涉羣書領正統九年鄉薦除昌黎訓導以母喪歸廬墓三年詔以孝行旌其閭聞河津薛瑄講濂洛之學遂罷公車往受業久之將歸瑄送至里門告之曰為學之要居敬窮理而已禹錫歸得其大指益務力行天順初大學士李賢薦為國子學正請嚴監規以塞奔競復武學以講備禦帝皆從之尋陞監丞

忤貴幸左遷徽州府經歷諸生伏闕乞留不允再遷至
南京國子監丞掌京衛武學四為同考官超拜監察御
史督畿內學取周子太極圖通書為士子講解一時多
士皆知向學成化十二年卒年五十一周蕙字廷芳秦
州人為臨洮衛卒戍蘭州年二十聽人講大學首章惕
然感動遂讀書州人段堅薛瑄門人也時方講學于里
蕙往聽之與辨析堅大服誨以聖學蕙乃研究五經又
從學安邑李景景亦瑄門人也由舉人官清水教諭學

使者歎其賢薦景代已命未下而卒蕙從之久學益邃
恭順侯吳瑾鎮陝西欲聘為子師固辭不赴或問之蕙
曰吾軍士也召役則可若以為師師豈可召哉瑾躬送
二子于其家蕙始納贄焉後還居泰州之小泉幅巾深
衣動必由禮州人多化之稱為小泉先生以父久遊江
南不返渡揚子江求父舟覆溺死蕙門人著者薛敬之
李錦王爵夏尚樸敬之字顯思渭南人五歲好讀書不
逐羣兒戲長從蕙游雞鳴侯門啟輒洒掃設座跪而請

教嘗語人曰周先生躬行孝弟學近伊洛吾以為師陝
州陳雲達忠信狷介事必持敬吾以為友憲宗初以歲
貢生入國學與同舍陳獻章並有盛名會父母相繼歿
號泣徒行大雪中遂成足疾母嗜韭終身不食韭成化
末選應州知州課績為天下第一弘治九年遷金華同
知居二年致仕卒年七十四所著有道學基統洙泗言
學錄爾雅便音思菴堊錄諸書思菴者敬之自號也其
門人呂柟最著自有傳錦字名中咸寧人舉天順六年

鄉試入國學為祭酒邢讓所知讓坐事下吏錦率衆抗
章白其非辜幼喪父事母色養執喪盡禮不作浮屠法
巡撫余子俊欲延為子師錦以齊衰不入公門固辭所
居僅蔽風雨布衣糲食義不妄取成化中選松江同知
卒官爵字錫之泰州人弘治初由國學生授保安州判
官有平允聲其教門人也務以誠敬為本

胡居仁字叔心餘干人聞吳與弼講學崇仁往從之游
絕意仕進其學以主忠信為先以求放心為要操而勿

失莫大乎敬因以敬名其齋端莊凝重對妻子如嚴賓
手置一冊詳書得失用自程考鵷衣簞食晏如也築室
山中四方來學者甚衆皆告之曰學以為己勿求人知
語治世則曰惟王道能使萬物各得其所所著有居業
錄蓋取修辭立誠之義每言與吾道相似莫如禪學後
之學者誤認存心多流于禪或欲屏絕思慮以求靜不
知聖賢惟戒慎恐懼自無邪思不求靜未嘗不靜也故
卑者溺于功利高者驚于空虛其患有二一在所見不

真一在功夫間斷嘗作進學箴曰誠敬既立本心自存
力行既久全體皆仁舉而措之家齊國治聖人能事畢
矣居仁性行淳篤居喪骨立非杖不能起三年不入寢
門與人語終日不及利祿與羅倫張元禎友善數會于
弋陽龜峯嘗言陳獻章學近禪悟莊景詩止豪曠此風
既成為害不細又病儒者撰述繁蕪謂朱子註參同契
陰符經皆不作可也督學李齡鍾成相繼聘主白鹿書
院過饒城淮王請講易傳待以賓師之禮是時吳與弼

以學名于世受知朝廷然學者或有間言居仁闇修自
守布衣終其身人以為薛瑄之後粹然一出于正居仁
一人而已卒年五十一萬厯十三年從祀孔廟復追諡
文敬其弟子余祐最著祐字子積鄱陽人年十九師事
居仁居仁以女妻之弘治十二年舉進士為南京刑部
員外郎以事忤劉瑾落職瑾誅起為福州知府鎮守太
監市物不予直民羣訴于祐涕泣慰遣之云將列狀上
聞鎮守懼稍戢然恚甚遣人入京告其黨曰不去余祐

鎮守不得自遂也然祐素廉撫拾竟無所得未幾遷山東副使父憂服闋補徐州兵備副使中官王敬運進御物入都多挾商船與知州樊準指揮王良詒良發其違禁物敬懼詣祐求解祐不聽敬誣奏準等毆已遂并逮祐謫為南寧府同知稍遷韶州知府投劾去嘉靖初歷雲南布政使以太僕寺卿召未行改吏部右侍郎祐已先卒祐之學墨守師說在獄中作性書三卷其言程朱教人專以誠敬入學者誠能去其不誠不敬者不患不

至古人時王守仁作朱子晚年定論謂其學終歸于存
養祐謂朱子論心學凡三變存齋記所言乃少時所見
及見延平而悟其失後聞五峯之學于南軒而其言又
一變最後改定已發未發之論然後體用不偏動靜交
致其力此其終身定見也安得執少年未定之見而反
謂之晚年哉其辨出守仁之徒不能難也

蔡清字介夫晉江人少走侯官從林圉學易盡得其肯
綮舉成化十三年鄉試第一二十年成進士即乞假歸

講學已調選得禮部祠祭主事王恕長吏部重清調為稽勲主事恒訪以時事清乃上二札一請振紀綱一薦劉大夏等三十餘人恕皆納用尋以母憂歸服闋復除祠祭員外郎乞便養改南京文選郎中一日心動急乞假養父歸甫兩月而父卒自是家居授徒不出正德改元即家起江西提學副使寧王宸濠驕恣遇朔望諸司先朝王次日謁文廟清不可先廟而後王王生辰令諸司以朝服賀清曰非禮也去蔽膝而入王積不悅會王

求復護衛清有後言王欲誣以詆毀詔旨清遂乞休王
佯輓留且許以女妻其子竟力辭去劉瑾知天下議已
用蔡京召楊時故事起清南京國子祭酒命甫下而清
已卒時正德三年也年五十六清之學初主靜後主虛
故以虛名齋平生飭躬砥行貧而樂施為族黨依賴以
善易名嘉靖八年其子推官存遠以所著易經四書蒙
引進于朝詔為刊布萬厯中追謚文莊贈禮部右侍郎
其門人陳琛王宣易時中林同趙逵蔡烈並有名而陳

琛最著琛字思獻晉江人杜門獨學清見其文異之曰
吾得友此人足矣琛因介友人見清清曰吾所發憤沉
潛辛苦而僅得者以語人常不解子已盡得之今且盡
以付子矣清歿十年琛舉進士授刑部主事改南京戶
部就擢考功主事乞終養歸嘉靖七年有薦其恬退者
詔徵之琛辭居一年即家起貴州僉事旋改江西皆督
學校並辭不赴家居卻掃一室偃臥其中長吏莫得見
其面同郡林希元字懋貞與琛同年進士歷官雲南僉

事坐考察不謹罷歸所著存疑等書與琛所著易經通
典四書淺說並為舉業所宗王宣晉江人弘治中舉于
鄉一赴會試不第以親老須養不再赴嘗曰學者混朱
陸為一便非真知為人廓落豪邁俯視一世易時中字
嘉會亦晉江人舉于鄉授東流教諭遷夏津知縣有惠
政稍遷順天府推官以治胡守中獄失要人意將中以
他事遂以終養歸道出夏津老稚爭獻果脯將別有哭
失聲者母年九十一而終時中七十矣毀不勝喪而卒

趙逢字子重東平人弘治中舉鄉試受易于清蔡氏易止行于閩南及是北行齊魯矣居母喪毀瘠後會試不第遂抗志不出生平好濂洛諸子之學于明獨好薛氏讀書錄蔡烈字文繼龍溪人父吳瓊州知府烈弱冠為諸生受知于清及莆田陳茂烈隱居鶴鳴山之白雲洞不復應試嘉靖十二年詔舉遺佚知府陸金以烈應以母老辭巡按李元陽檄郡邑建書院亦固辭忽山鳴三日烈遂卒主簿詹道嘗請論心烈曰宜論事孔門求仁

未嘗出事外也堯舜之道孝弟而已夫子之道忠恕而已學士豐熙戍鎮海見烈歎曰先生不言躬行熙已心醉矣

羅欽順字允升泰和人弘治六年進士及第授編修遷南京國子監司業與祭酒章懋以實行教士未幾奉親歸因乞終養劉瑾怒奪職為民瑾誅復官遷南京太常少卿再遷南京吏部右侍郎入為吏部左侍郎世宗即位命攝尚書事上疏言久任超遷法當疏通不報大禮

議起欽順請慎大禮以全聖孝不報遷南京吏部尚書
省親乞歸改禮部尚書會居憂未及拜再起禮部尚書
辭又改吏部尚書下詔敦促再辭許致仕有司給祿米
時張璫桂萼以議禮驟貴秉政樹黨屏逐正人欽順耻
與同列故屢詔不起里居二十餘年足不入城市潛心
格物致知之學王守仁以心學立教才知之士翕然師
之欽順致書守仁略曰聖門設教文行兼資博學于文
厥有明訓如謂學不資于外求但當反觀內省則正心

誠意四字亦何所不盡必于入門之際加以格物工夫
哉守仁得書亦以書報大略謂理無內外性無內外故
學無內外講習討論未嘗非內也反觀內省未嘗遺外
也反復二千餘言欽順再以書辨曰執事云格物者格
其心之物也格其意之物也格其知之物也正心者正
其物之心也誠意者誠其物之意也致知者致其物之
知也自有大學以來未有此論夫謂格其心之物格其
意之物格其知之物凡為物也三謂正其物之心誠其

物之意致其物之知其為物也一而已矣就三而論以
程子格物之訓推之猶可通也以執事格物之訓推之
不可通也就一物而論則所謂物果何物耶如必以為
意之用雖極安排之巧終無可通之日也又執事論學
書有云吾心之良知即所謂天理致吾心良知之天理
于事物則事事物物皆得其理矣致吾心之良知者致
知也事事物物各得其理者格物也審如所言則大學
當云格物在致知不當云致知在格物與物格而后知

至矣書未及達守仁已歿欽順為學專力于窮理存心
知性初由釋氏入既悟其非乃力排之謂釋氏之明心
見性與吾儒之盡心知性相似而實不同釋氏之學大
抵有見于心無見于性今人明心之說混于禪學而不
知有千里毫釐之謬道之不明將由于此欽順有憂焉
為著困知記自號整菴年八十三卒贈太子太保謚文
莊

曹端字正夫澠池人永樂六年舉人五歲見河圖洛書

即畫地以質之父及長專心性理其學務躬行實踐而
以靜存為要讀宋儒太極圖通書西銘歎曰道在是矣
篤志研究坐下著足處兩軌皆穿事父母至孝父初好
釋氏端為夜行燭一書進之謂佛氏以空為性非天命
之性老氏以虛為道非率性之道父欣然從之繼遭二
親喪五味不入口既葬廬墓六年端初讀謝應芳辨惑
編篤好之一切浮屠巫覡風水時日之說屏不用上書
邑宰毀淫祠百餘為設里社里穀壇使民祈報年荒勸

振存活甚衆為霍州學正修明聖學諸生服從其教郡人皆化之耻爭訟知府郭晟問為政端曰其公廉乎公則民不敢謾廉則吏不敢欺晟拜受遭艱歸澠池霍諸生多就墓次受業服闋改蒲州學正霍蒲兩邑各上章爭之霍奏先得請先後在霍十六載宣德九年卒官年五十九諸生服心喪三年霍人罷市巷哭童子皆流涕貧不能歸葬遂留葬霍二子瑜琛亦廬端墓相繼死葬墓側後改葬澠池端嘗言學欲至乎聖人之道須從太

極上立根脚又曰為人須從志士勇士不忘上參取又曰孔顏之樂仁也孔子安仁而樂在其中顏淵不違仁而不改其樂程子令人自得之又曰天下無性外之物而性無不在焉性即理也理之別名曰太極曰至誠曰至善曰太德曰大中名不同而道則一初伊洛諸儒自明道伊川後劉絢李籲輩身及二程之門至河南許衡洛陽姚樞講道蘇門北方之學者翕然宗之泊明興三十餘年而端起嶠澗間倡明絕學論者推為明初理學

之冠所著有孝經述解四書詳說周易乾坤二卦解義
大極圖說通書西銘釋文性理文集儒學宗統譜存疑
錄諸書霍州李德與端同時亦講學于其鄉及見端退
語諸生曰學不厭教不倦曹子之盛德也至其知古今
達事變末學鮮或及之古云得經師易得人師難諸生
得人師矣遂避席去端亦高其行誼命諸生延致之講
明正學初端作川月交映圖擬太極學者稱月川先生
及歿私謚靜修正德中尚書彭澤河南巡撫李禎請從

祀孔子廟庭不果

吳與弼字子傳崇仁人父溥建文時為國子司業永樂中為翰林修撰與弼年十九見伊洛淵源圖慨然嚮慕遂罷舉子業盡讀四子五經洛閩諸錄不下樓者數年中歲家益貧躬親耕稼非其義一介不取四方來學者約已分少飲食教誨不倦正統十一年山西僉事何自學薦于朝請授以文學高職後御史涂謙撫州知府王宇復薦之俱不出嘗歎曰宦官釋氏不除而欲天下治

平難矣景泰七年御史陳述又請禮聘與弼俾侍經筵
或用之成均教育胄子詔江西巡撫韓雍備禮敦遣竟
不至天順元年石亨欲引賢者為己重謀于大學士李
賢屬草疏薦之帝乃命賢草敕加束帛遣行人曹隆賜
璽書齋禮幣徵與弼赴闕比至帝問賢曰與弼宜何官
對曰宜以宮僚侍太子講學遂授左春坊左諭德與弼
疏辭賢請賜召問且與館次供具于是召見文華殿顧
語曰聞處士義高特行徵聘奚辭職為對曰臣草茅賤

士本無高行陛下垂聽虛聲又不幸有狗馬疾束帛造
門臣慙被異數匍匐京師今年且六十八矣實不能官
也帝曰官僚優閒不必辭賜文綺酒牢遣中使送館次
顧謂賢曰此老非迂濶者務令就職時帝眷遇良厚而
與弼辭益力又疏稱學術荒陋苟冒昧徇祿必且曠官
詔不許乃請以白衣就邸舍假讀秘閣書帝曰欲觀秘
書勉受職耳命賢為諭意與弼留京師二月以疾篤請
賢請曲從放還始終恩禮以光曠舉帝然之賜敕慰勞

賚銀幣復遣行人送還命有司月給米二石與弼歸上
表謝陳崇聖志廣聖學等十事成化五年卒年七十九
與弼始至京賢推之上座以賓師禮事之編修尹直至
今坐于側直大愠出即謗與弼及與弼歸知府張瓚謁
見不得大恚募人代其弟投牒訟與弼立遣吏攝之大
加侮慢始遣還與弼諒非弟意友愛如初編修張元禎
不知其始末遺書謂讓有上告素王正名討罪豈容先
生久竊虛名語直復筆其事于瑣綴錄又言與弼跋亨

族譜自稱門下士士大夫用此訾與弼後顧允成論之
曰此好事者為之也與弼門人後皆從祀而與弼竟不
果所著日錄悉自言生平所得其門人最著者曰胡居
仁陳獻章婁諒次曰胡九韶謝復鄭伉胡九韶字鳳儀
少從與弼學諸生來學者與弼令先見九韶及與弼歿
門人多轉師之家貧課子力耕僅給衣食成化中卒謝
復字一陽祁門人聞與弼倡道棄科舉業從之游身體
力行務求自得居家孝友喪祭冠婚悉遵古禮或問學

曰知行並進否則落記誦詁訓矣晚卜室西山之麓學者稱西山先生弘治末年卒年六十五鄭伋字孔明常山人為諸生試有司不偶即棄去師與弼辭歸日究諸儒論議一切折衷于朱子事親孝設義學立社倉以惠族黨所著易義發明讀史管見觀物餘論蛙鳴集多燼于火

陳真晟字晦德漳州鎮海衛人初治舉業赴鄉試聞有司防察過嚴無待士禮耻之棄去遂篤志聖賢之學

讀大學或問見朱子重言主敬知敬為大學始基又得
程子主一之說專心克治歎曰大學誠意為鐵門關主
一二字乃其玉鑰匙也天順二年詣闕上程朱正學纂要
其書首取程氏學制次采朱子論說次作二圖一著聖
人心與天地同運一著學者之心法天之運終言立明
師輔皇儲隆教本數事以畢圖說之意書奏下禮部議
侍郎鄒幹寢其事真晟歸聞臨川吳與弼方講學欲就
問之過南昌張元禎止之宿與語大推服曰斯道自程

朱以來惟先生得其真如康齋者不可見亦不必見也
遂歸閩潛思靜坐自號漳南布衣卒于成化十年年六
十四真晟學無師承獨得于遺經之中自以僻處海濱
出而訪求當世學者雖未與與弼相證要其學頗似近
之

呂柟字仲木高陵人別號涇野學者稱涇野先生正德
三年登進士第一授修撰劉瑾以柟同鄉欲致之謝不
往又因西夏事疏請帝入宮親政事潛消禍本瑾惡其

直欲殺之引病去瑾誅以薦復官乾清宮災應詔陳六事其言除義子遣番僧取回鎮守太監尤人所不敢言是年秋以父病歸都御史盛應期御史朱節熊相曹珪累疏薦適世宗嗣位首召珪上疏勸勤學以為新政之助畧曰克己慎獨上對天心親賢遠讒下通民心庶太平之業可致大禮議興與張桂忤以十三事自陳中以大禮未定諡言日進引為己罪上怒下詔戾謫解州判官攝行州事恤筭獨減丁役勸農桑興水利築堤護鹽

池行呂氏鄉約及文公家禮求子夏後建司馬溫公祠
四方學者日至御史為闢解梁書院以居之三年御史
盧煥等累薦陞南京宗人府經歷歷官尚寶司卿吳楚
閩越士從者百餘人晉南京大僕寺少卿太廟灾乞罷
黜不允遷國子監祭酒晉南京禮部右侍郎署吏部事
帝將躬祀顯陵累疏勸止不報值天變遂乞致仕歸年
六十四卒高陵人為罷市者三日解梁及四方學者聞
之皆設位持心喪計聞上輟朝一日賜祭塋柩受業渭

南薛敬之接河東薛瑄之傳學以窮理實踐為主官南都與湛若水鄒守益共主講席仕三十餘年家無長物終身未嘗有惰容時天下言學者不歸王守仁則歸湛若水獨守程朱不變者惟柵與羅欽順云所著有四書因問易說翼書說要詩說序春秋說志禮問內外篇史約小學釋寒暑經圖解史館獻納宋四子抄釋南省奏藁涇野詩文集萬厯崇禎間李禎趙錦周子義王士性蔣德璟先後請從祀孔廟下部議未及行柵弟子涇陽

呂潛字時見舉于鄉官工部司務張節字介夫咸寧李挺字正五皆有學行潛里人郭鄂字維藩由舉人官馬湖知府藍田王之士字欲立由舉人以趙用賢薦授國子博士兩人不及柵門亦秦士之篤學者也

邵寶字國賢無錫人年十九學于江浦莊景成化二十年舉進士授許州知州月朔會諸生于學宮講明義利公私之辨正賴考叔祠墓改魏文帝廟以祠漢愍帝不稱獻而稱愍從昭烈所謚也平言龍骨出地中為禍福

寶取骨毀于庭杖巫而遣之躬課農桑做朱子社倉立積散法行計口澆田法以脩凶荒弘治七年入為戶部員外郎歷郎中遷江西提學副使釋菜周元公祠修白鹿書院學舍處學者其教以致知力行為本江西俗好陰陽家言有數十年不葬父母者寶下令士不葬親者不得與試于是相率舉葬以千計寧王宸濠索詩文峻却之後宸濠敗有司校勘獨無寶跡遷浙江按察使再遷右布政使與鎮守太監勘處州銀礦寶曰費多獲少

勞民傷財慮生他變卒奏寢其事進湖廣布政使正德
四年擢右副都御史總督漕運劉瑾擅政寶至京絕不
與通瑾怒漕帥平江伯陳熊欲使寶劾之遣校尉數輩
要寶左順門危言恐之曰行逮汝張綵曹元自內出語
寶曰君第劾平江無後患矣寶曰平江功臣後督漕未
久無大過不知所劾二人默然出越三日給事中劾熊
併及寶勒致仕去瑾誅起巡撫貴州尋遷戶部右侍郎
進左侍郎命兼左僉都御史處置糧運及會勘通州城

濠歸奏稱旨尋疏請終養歸御史唐鳳儀葉忠請用之
留都便養乃拜南京禮部尚書再疏辭免世宗即位起
前官復以母老懇辭許之命有司以禮存問久之卒贈
太子太保謚文莊寶三歲而孤事母過氏至孝甫十歲
母疾為文告天願減已算延母年及終養歸得疾左手
不仁猶朝夕侍親側不懈學以洛閩為的嘗曰吾願為
真士大夫不願為假道學舉南畿受知于李東陽為詩
文典重和雅以東陽為宗至于原本經術粹然一出于

正則其所自得也博綜羣籍有得則書之簡取程子今日格一物明日格一物之義名之曰日格子所著學史簡端二錄巡撫吳廷舉上于朝外定性書說漕政舉要諸集若干卷學者稱二泉先生其門人同邑王問字子裕以學行稱嘉靖十七年成進士授戶部主事監徐州倉減羨耗十二三以父老乞便養改南京職方遷車駕郎中廣東僉事行未半道乞養歸父卒遂不復仕築室湖上讀書三十年不履城市數被薦不起工詩文書畫

清修雅尚士大夫皆慕之卒年八十門人私謚曰文靜
先生子鑑字汝明嘉靖末年進士累官吏部稽勲郎中
念父老謝病歸奉養不離側父歿久之進尚寶卿改南
京鴻臚卿引年乞休進太僕卿致仕鑑亦善畫有言勝
其父者遂終身不復作

楊蕪字方震豐城人父崇永州知府受業吳興弼門人
胡九韶蕪承家學早以文行稱舉成化末年進士改庶
吉士弘治三年授南京戶科給事中明年京師地震劾

用事大臣五年以災異上六事一經筵停罷時宜日令
講官更直待問二召用言事遷謫官不當限臺諫及登
極以後三治兩浙三吳水患停額外織造四召林下恬
退諸臣五刪法司條例六災異策免大臣未言遇大政
宜召大臣面議給事議史隨入駁正帝頗納之吏部尚
書王恕被讒廉請斥讒邪毋為所惑母喪服闋起任刑
科請祀薛瑄取讀書錄貯國學明年三月有詔以下旬
御經筵廉言故事經筵一月三舉苟以月終起以月初

罷則進講有幾且經筵啟而後日講繼之今遲一日之
經筵即輟一句之日講也報聞以父老欲便養復改南
京兵科中官李廣死得廷臣通賄籍言官劾賄者帝欲
究而中止庶率同官力爭竟不納已請申明祀典謂宋
儒周程張朱從祀之位宜居漢唐諸儒上闕里廟當更
立木主大成本樂名不合謚法皆不果行遷南京光祿
少卿正德初就改太僕歷順天府尹時京軍數出車費
動數千金廩請大興遞運所餘銀供之奏免夏稅萬五

千石慮州縣巧取民財置歲辦簿吏無能為奸乾清宮
災極陳時政缺失疏留中明年擢南京禮部右侍郎上
疏諫南巡不報帝駐南京命百官戎服朝見庶不可乞
用常儀更請謁見太廟俱報許世宗即位就遷尚書庶
與羅欽順善為居敬窮理之學文必根六經自禮樂錢
穀至星厯算數具識其本末學者稱月湖先生嘗以帝
王之道莫切于大學自為給事即上言進講宜先大學
衍義至是首進大學衍義節畧帝優詔答之疏論大禮

引程頤朱熹言為證且言今異議者悉祖歐陽修然修于考之一字雖欲加之于濮王未忍絕之于仁宗今乃欲絕之于孝廟此又修所不忍言者報聞入疏乞休至嘉靖二年賜敕馳驛給夫廩如制家居二年卒年七十四贈太子少保諡文恪

劉觀字崇觀吉水人正統四年成進士方年少忽引疾告歸尋丁內艱服除終不出杜門讀書求聖賢之學四方來問道者坐席常不給縣令劉成為築書院于虎邱

山名曰養中平居飯脫粟服澣衣翛然自得每日端坐
一室無懈容或勸之仕不應又作勤儉恭恕四箴以教
其家取呂氏鄉約表著之以教其鄉冠婚喪祭悉如朱
子家族有孤嫠不能自存者周之或請著述曰朱子及
吳文正之言尊信之足矣復何言吳與弼其鄰郡人也
極推重之觀前有孫鼎廬陵人永樂中為松江府教授
以孝弟立教後督學南畿人稱為貞孝先生又有李中
吉水人官副都御史號谷平先生在觀後是為吉水三

先生

馬理字伯循三原人同里尚書王恕家居講學著書理從之遊得其指授楊一清督學政見理與呂柟康海文大奇之曰康生之文章馬生呂生之經學皆天下士也登鄉薦入國學與柟及林慮馬卿榆次寇天叙安陽崔銑張士隆同縣秦偉日切劘于學名震都下高麗使者慕之錄其文以去連遭艱不預試安南使者至問主事黃清曰關中馬理先生安在何不仕也其為外商所重

如此正德九年舉進士一清為吏部尚書即擢理稽勲
主事調文選請告歸起考功主事偕郎中張衍瑞等諫
南巡詔跪闕門予杖奪俸未幾復告歸教授生徒從游
者衆嘉靖初起稽勲員外郎與郎中余寬等伏闕爭大
禮下詔獄再予杖奪俸屢遷考功郎中故戶部郎中莊
繹者正德時首導劉瑾覈天下庫藏瑾敗落職至是奏
辨求復當路者屬理理力持不可寢其事五年大計外
吏大學士賈詠吏部尚書廖紀以私憾欲去廣東副使

魏校河南副使蕭鳴鳳陝西副使唐龍理力爭曰三人督學政名著天下必欲去三人請先去理乃止明年大計京官黜張璁桂萼黨吏部郎中彭澤璁萼竟取旨留之理擢南京通政參議請急去居三年起光祿卿未幾告歸闕十年復起南京光祿卿尋引年致仕三十四年陝西地震理與妻皆死理學行純篤居喪取古禮及司馬光書儀朱子家禮折衷用之與呂柟並為關中學者所宗穆宗立贈右副都御史天啟初追謚忠憲

魏校字子才崑山人其先本李姓居蘇州葑門之莊渠因自號莊渠弘治十八年成進士歷南京刑部郎中守備太監劉瑯藉劉瑾勢張甚或自判狀送法司莫敢抗者校直行已意無所徇改兵部郎中移疾歸嘉靖初起為廣東提學副使丁憂服闋補江西兵備副使累遷國子祭酒太常卿尋致仕校私淑胡居仁主敬之學而貫通諸儒之說擇執尤精嘗與余祐論性畧曰天地者陰陽五行之本體也故理無不具人物之性皆出于天地

然而人得其全物得其偏又曰古聖賢論性有二其一性與情對言此是性之本義直指此理而言其一性與習對言但取生字為義非性之所以得名蓋曰天所生為性人所為曰習耳先儒因性相近一語遂謂性兼氣質而言不知人性上下不可添一物纔著氣質便不得謂之性矣荀子論性惡揚子論性善惡混韓子論性有三品衆言淆亂必折之聖若謂夫子性相近一言正論性之所以得名則前後說皆不謬于聖人而孟子道性

善反為一偏之論矣孟子見之分明故言之直捷但未
言性為何物故荀揚韓諸儒得以其說亂之伊川一言
以斷之曰性即理也則諸說皆不攻自破矣所著有太
學指歸六書精蘊卒謚恭簡唐順之王應電王敬臣皆
其弟子也順之自有傳王應電字昭明崑山人受業于
校篤好周禮謂周禮自宋以後胡宏季本各著書指摘
其瑕釁至數十萬言而余壽翁吳澄則以為冬官未嘗
亡雜見于五官中而更次之近世何喬新陳鳳梧舒芬

亦各以已意更定然此皆諸儒之周禮也覃研十數載
先求聖人之心溯斯禮之源次考天象之文原設官之
意推五官離合之故見網維統體之極因顯以探微因
細而繹大成周禮傳詁數十卷以為百世繼周而治必
出于此嘉靖中家燬于兵燹流寓江西泰和以其書就
正羅洪先洪先大服翰林陳昌積以師禮事之胡松撫
江西刊行于世應電又研精字學據說文所載譌謬甚
者為之訂正名曰經傳正譌又著同文備考書法指要

六義音切貫珠圖六義相關圖卒于泰和昌積為經紀
其喪歸之崑山時有李如玉者同安儒生亦精于周禮
為會要十五卷嘉靖八年詣闕上之得旨嘉獎賜冠帶
王敬臣字以道長洲人江西參議庭子也十九為諸生
受業于校性至孝父疽發背親自吮舐老得瘡肱疾則
臥于榻下夜不解衣微聞謦歔聲即躍起問安事繼母
如事父妻失母歡不入室者十三載初授校黥成之旨
嘗言議論不如著述著述不如躬行故居常杜口不談

自見耿定向語以聖賢無獨成之學由是多所誘掖弟子從游者至四百餘人其學以慎獨為先而指親長之際衽席之間為慎獨之本尤以標立門戶為戒鄉人尊為少湖先生萬歷中以廷臣薦徵授國子博士辭不行詔以所授官致仕二十一年巡按御史甘士价復薦吏部以敬臣年高請有司時加優禮詔可年八十五而終周瑛字梁石莆田人成化五年進士知廣德州以善政聞賜敕旌異遷南京禮部郎中出為撫州知府調知鎮

達秩滿省親歸弘治初吏部尚書王恕起瑛四川參政久之進右布政使咸有善績尤勵清節給事御史交章薦大臣亦多知瑛而瑛以母喪歸服除遂引年乞致仕孝宗嘉之詔進一階正德中卒年八十七瑛始與陳獻章友獻章之學主于靜瑛不然之謂學當以居敬為主敬則心存然後可以窮理自六經之奧以及天地萬物之廣皆不可不窮積累既多則能通貫而于道之一本亦自得之矣所謂求諸萬殊而後一本可得也學者稱

翠渠先生子大謨登進士未仕卒

潘府字孔修上虞人成化末進士值憲宗崩孝宗踐祚甫二十日禮官請衰服御西角門視事明日釋衰易素翼善冠麻衣腰經帝不許命俟二十七日後行之至百日帝以大行未塋麻衣衰經如故府因上疏請行三年喪畧言子為父臣為君皆斬衰三年仁之至義之盡也漢文帝遺詔短喪止欲便天下臣民景帝遂自行之使千古綱常一墜不振晉武帝欲行而不能魏孝文行之

而不盡宋孝宗銳志復古易月之外猶執通喪然不能
推之于下未足為聖王達孝也先帝奄棄四海臣庶銜
哀陛下惻怛由哀麻衣視朝百日未改望排羣議斷自
聖心執喪三年一如三代舊制詔禮官參考載籍使喪
不廢禮朝不廢政勒為彝典傳之子孫豈不偉哉疏入
哀經待罪詔輔臣會禮官詳議並持成制寢不行謁選
得長樂知縣教民行朱子家禮躬行郊野勞問疾苦田
夫野老咸謂府親已就求筆札府輒欣然與之遷南京

兵部主事陳軍民利病七事父喪除補刑部值旱蝗星
變鞭耒深入孔廟災疏請內修外攘以謹天戒又上救
時十要以便養乞南改南京兵部遷武選員外郎尚書
馬文升知其賢超拜廣東提學副使雲南晝晦七日楚
婦人鬚長三寸上弭災三術以母老乞休不待命輒歸
已而吏部尚書楊一清及巡按御史吳華屢薦其學行
終不起嘉靖改元言官交薦起太僕少卿改太常致仕
既歸屏居南山布衣蔬食惟以發明經傳為事時王守

仁講學其鄉相去不百里頗有異同嘗曰居官之本有三薄奉養庶之本也遠聲色勤之本也去讒私明之本也又曰薦賢當惟恐後論功當惟恐先年七十三卒故事四品止予祭世宗重府孝行特詔予塋

崔銑字子鍾安陽人父陞官參政銑舉弘治十八年進士選庶吉士授編修預修孝宗實錄與同官見太監劉瑾獨長揖不拜由是忤瑾書成出為南京吏部主事瑾敗召復故官充經筵講官進侍讀引疾歸作後渠書屋

讀書講學其中世宗即位擢南京國子監祭酒嘉靖三年集議大禮久不決大學士蔣冕尚書汪俊俱以執議去位其他擯斥杖戍者相望而張璁桂萼等驟貴顯用事銑上疏求去且劾璁萼等曰臣竊觀議者其文則歐陽修之唾餘其情則承望意向求勝無已悍者危法以激怒柔者甘言以動聽非有元功碩德而遽以官賞之得毋使僥倖之徒踵接至與臣聞天子得四海歡心以事其親未聞僅得一二人之心者也賞之適自章其私

昵而已夫守道為忠忠則逆旨希旨為邪邪則畔道今
忠者日疏而邪者日富一邪亂邦況可使富哉帝覽之
不悅令銑致仕閱十五年用薦起少詹事兼侍讀學士
擢南京禮部右侍郎未幾疾作復致仕卒贈禮部尚書
謚文敏銑少輕俊好飲酒盡數斗不亂中歲自厲於學
言動皆有則嘗曰學在治心功在慎動又曰孟子所謂
良知良能者心之用也愛親敬長性之本也若去良能
而獨挈良知是霸儒也又嘗作政議十篇其序曰三代

而上井田封建其民固故道易行三代而下阡陌郡縣其民散故道難成況沿而下趨至今日乎然人心弗異係乎主之者而已凡篇中所論說悉倣此意世多有其書故不載

何瑋字粹夫武陟人年七歲見家有佛像抗言請去之十九讀許衡薛瑄遺書輒欣然忘寢食弘治十五年成進士選庶吉士閣試克己復禮為仁論有曰仁者人也禮則人之元氣而已則見侵於風寒暑濕者也人能無

為邪氣所勝則元氣復元氣復而其人成矣宿學咸推服焉劉瑾竊政一日贈翰林川扇有入而拜見者瑋時官修撰獨長揖瑾怒不以贈受贈者復拜謝瑋正色曰何僕僕也瑾大怒詰其姓名瑋直應曰修撰何瑋知必不為瑾所容乃累疏致仕後瑾誅復官以經筵觸忌諱謫開州同知修黃陵岡隄成擢東昌府同知乞歸嘉靖初起山西提學副使以父憂不赴服闋起提學浙江敦本尚實士氣丕變未幾晉南京太常少卿與湛若水等

修明古太學之法學者翕然宗之歷工戶禮三部侍郎
晉南京右都御史未幾致仕是時王守仁以道學名于
時塘獨默如嘗言陸九淵楊簡之學流入禪宗充塞仁
義後學未得游夏十一而議論即過顏曾此吾道大害
也里居十餘年教子姓以孝弟忠信一介必嚴兩執親
喪皆哀毀後謚文定所著陰陽律呂儒學管見柏齋集
十二卷皆行于世

唐伯元字仁卿澄海人萬曆二年進士歷知萬年泰和

二縣並有惠政民生祠之遷南京戶部主事進郎中伯
元受業永豐呂懷踐履篤實而深疾王守仁新說及守
仁從祀文廟上疏爭之因請黜陸九淵而躋有若及周
程張朱五子于十哲之列祀羅欽順章懋呂柟魏校呂
懷蔡清羅洪先王艮于鄉疏方下部旋為南京給事中
鍾宇淳所駁伯元謫海州判官屢遷尚寶司丞吏部尚
書楊巍雅不喜守仁學心善伯元前疏用為吏部員外
郎歷考功文選郎中佐尚書孫丕揚澄清吏治苞苴不

及其門秩滿推太常少卿未得命時吏部推補諸疏皆留中伯元言賢愚同滯朝野咨嗟由臣擬議不當所致乞賜罷斥帝不憚特允其去而諸疏仍留不下居二年甄別吏部諸郎帝識伯元名命改南京他部而伯元已前卒伯元清苦淡薄人所不堪甘之自如為嶺海士大夫儀表

黃淳耀字蘊生嘉定人為諸生時深疾科舉文浮靡淫麗乃原本六經一出以典雅名士爭務聲利獨淡漠自

甘不事徵逐崇禎十六年成進士歸益研經籍緼袍糲
食蕭然一室京師臨福王立南都諸進士悉授官淳耀
獨不赴選及南都亡嘉定亦破慼然太息偕弟淵耀入
僧舍將自盡僧曰公未服官可無死淳耀曰城亡與亡
豈以出處貳心乃索筆書曰弘光元年七月二十四日
進士黃淳耀自裁于城西僧舍嗚呼進不能宣力王朝
退不能潔身自隱讀書寡益學道無成耿耿不寐此心
而已遂與淵耀相對縊死年四十有一淳耀弱冠即著

自監錄知過錄有志聖賢之學後為日歷畫之所為夜
必書之凡語言得失念慮純雜無不備識用自省改晚
而充養和粹造詣益深所作詩古文悉軌先正卓然名
家有陶菴集十五卷其門人私謚之曰貞文淵耀字偉
恭諸生好學敦行如其兄

明史卷二百八十二

欽定四庫全書

明史卷二百八十二考證

陳謨傳陳謨字一德泰和人

臣方煒按謨所著有海

桑集門人楊士奇所編次稱謨為廬陵人此作泰和
未知孰是謹附考

薛瑄傳英宗復辟拜禮部右侍郎兼翰林院學士入閣

預機務

臣

方煒按瑄之入閣以左都御史楊善之

薦在是年正月甲申文謙等之死在是月丁亥見明

實錄傳所云後二日雖不誤然上文並未書日究屬無根謹擬刪且瑄於是年五月陞本部左侍郎仍兼學士傳未載謹據增

薛瑄傳疏乞骸骨

臣

方偉按瑄之以老疾乞致仕也

在天順元年六月見明實錄謹附識

薛瑄傳贈禮部侍郎謚文清

臣

方偉按正德元年五

月錄瑄孫葵於中書舍人習字出身見明實錄謹附

識

薛瑄傳

閩禹錫附

禹錫歸得其大指益務力行

臣方

煒按禹錫從瑄歸後考功員外郎紀振薦為開州訓

導見識大錄傳未載謹附識

薛瑄傳

閩禹錫附

超拜監察御史

臣方煒按是時吏

部尚書王鏊欲大用禹錫不果及姚夔代鏊集廷議

求學行殊等者任督學僉舉禹錫遂拜御史見識大

錄謹附識

胡居仁傳

余祐附

以事忤劉瑾落職

臣方煒按祐為

南刑部時與李承勛魏校胡世寧友時稱南都四君子正德初勲臣有爭襲者祐嘗署其案忤瑾意遂落職見識大錄謹附識

胡居仁傳

余祐附

嘉靖初歷雲南布政使

臣方煒按

嘉靖改元復祐原官陞河南按察使平反冤獄與撫按爭可否至不能堪乃因考察劾之有心慕乎古氣失於偏之語祐曰偏則有之慕古吾何敢坐調廣西按察使旋有雲南之擢見識大錄謹附識

蔡清傳王恕長吏部重清調為稽勲主事

臣方煒按

清居吏部時庶吉士鄒智以言事下獄罪不測刑部尚書何喬新方在告清強之出喬新即疏救智乃得以謫去見獻徵錄謹附識

蔡清傳萬厯中追謚文莊贈禮部右侍郎

臣方煒按

是時僉都御史詹仰庇以易名請遂予謚大學士李廷機復為請乃獲贈典見明實錄謹附識

蔡清傳

陳琛附

授刑部主事改南京戶部

臣方煒按

琛為南戶部時推淮安舟稅常額既足大開關門恣商人來往上官責其弛慢琛引古以抗之見獻徵錄

謹附識

羅欽順傳再遷南京吏部右侍郎

臣方煒按欽順由

南京入為吏部右侍郎世宗即位乃轉左見獻徵錄
與此小異謹附考

羅欽順傳為著困知記自號整菴

臣方煒按欽順年

八十時巡撫都御史張岳言欽順攘斥異端功在聖

門宜舉引年之典乃詔撫按官及門存問見識大錄

謹附錄

曹端傳後改葬渑池

臣方煒按正統中僉事張敬奏

請建祠於渑池祀端見識大錄謹附識

吳與弼傳賜敕慰勞賚銀幣復遣行人送還

臣方煒

按與弼之放還也召入文華殿勉以著書垂後仍敕
行人王惟善曰天氣近寒與弼邁矣其善護之見明
實錄謹附識

呂桷傳乾清宮災應詔陳六事

臣方煒按桷所陳六

事一逐日臨期聽政二還處宮寢以圖儲貳三郊祀
帝嘗躬親承事四日朝兩宮五遣義子番僧邊軍六
取回鎮守太監見明實錄謹附識

呂桷傳大禮議興與張桂五以十三事自陳

臣方煒

按桷所自陳十三事明實錄諸書皆無可考謹識

呂桷傳上輟朝一日賜祭葬

臣方煒按桷卒後贈禮

部尚書謚文簡見陝西通志傳未載謹附考

邵寶傳遷江西提學副使 臣方煒按寶之官提學也

由周經劉大夏之薦見識大錄謹附識

邵寶傳瑾怒漕帥平江伯陳熊欲使寶劾之 臣方煒

按是時瑾索熊金錢不應故怒之熊被劾後下詔獄
謫戍海南衛見明紀事本末謹附識

楊廉傳京師地震劾用事大臣 臣方煒按廉劾諸大

臣時並薦張元楨吳寬李東陽王鏊劉戩宜備日講

見明實錄謹附識

楊廉傳復改南京兵科

臣

方煒按廉改兵科時再疏

論黜陟謂藩臬周瑛周孟中王鴻儒知府張吉知州
王雲鳳俱有政聲乞照天順例賜楮幣宴禮部破格
陞擢以收才望見獻錄謹附識

楊廉傳歷順天府尹

臣

方煒按廉尹順天時以昌平

歲辦不給奏陞為州轄密雲順義懷柔三縣見明實

錄謹附識

劉觀傳

李中附

又有李中吉水人

臣

方煒按中由正

德九年進士授工部主事以言事謫廣東驛丞王守仁撫贛州檄參其軍預平宸濠嘉靖初由故官累遷右僉都御史巡撫山東歲歉令民捕蝗者倍予穀蝗絕而饑者濟禽劇盜闢繼光鄰境攘其功中不與辨進副都御史總督南京糧儲未幾卒光宗時追謚莊介見明實錄傳未詳載謹附識

魏校傳補江西兵備副使
臣方煒按校補兵備副使
力辭旋改命督學河南見明實錄謹附識

魏校傳 王敬臣附

自見耿定向語以聖賢無獨成之學

由是多所誘掖

臣

方煒按定向督學南畿高敬行

行誼逾格貢焉強之赴京以親老力辭見識大錄謹

附識

潘府傳陳軍民利病七事

臣

方煒按府所陳七事及

十要三衍明實錄諸書皆無可考謹識

崔銑傳父陞官參政

臣

方煒按銑父陞由郎官出為

四川參政歷官廉慎在蜀時與僉事曲銑齊名見獻

徵錄謹附識

何塘傳弘治十五年成進士選庶吉士

臣方煒按武

宗即位塘時初授編修因新政抗疏乞復史職不報
見識大錄謹附識

何塘傳後瑾誅復官

臣

方煒按塘復官時疏請籍沒

賊吏以杜禍原為所司議格見獻徵錄謹附識

何塘傳歷工戶禮三部侍郎晉南京右都御史

臣方

煒按嘉靖六年塘由太常卿遷南工部侍郎奏革神

帛堂各宮監機戶夫匠冗費歲以數萬計未幾調北
工部改戶部復改禮部再謝病御史毛鳳詔等疏留
詔在京調治都御史之擢則嘉靖九年也見明實錄
謹附識

何瑋傳後謚文定

臣方燁按明實錄瑋之賜謚在隆

慶初年是時並贈禮部尚書傳未載謹附識

明史卷二百八十二考證

附明史卷二百八十二考證後

乾隆四十一年

賜謚諸臣

黃淳耀 黃淵耀

以上通謚忠節

